





晞髮集卷之四

宋 長溪謝 翱著

明 邑令張蔚然

郡人徐 勗訂

邑人郭鳴琳校

七言古體下

冬青樹引別玉潛

冬青樹山南陞九日靈禽居上枝知君種年星
在尾根到九泉雜龍髓恒星晝霄夜不見七度



山南與鬼戰願君此心無所移此樹終有開花
時山南金粟見離離白衣人拜樹下起靈禽啄
栗枝上飛

贈寫照唐子良

吳中衆史今代畫不獨畫人兼畫馬唐生家住
金華雲對予獨肯畫古人夕陽西下東流水紛
紛古人呼不起東都留守吳中豪王府勲僚舊
俊髦當時氣薄陰山日勾陳蒼蒼太白高百年
水竭海塵上誰見凌烟拂蛛網霜髯磔磔開清

新彷彿猶帶黃河水忽疑稍會怒色止或可從
傍窺諫紙唐生見我淚如洗頗憶古人今不死
俟我氣定神始閒命筆更起唐衣冠

種葵蒲萄下

栽葵花種蒲萄下年年葉長見花謝蒲萄漸密
花漸遲開時及見蒲萄垂微風搖曳架上枝陰
雲凝碧行琉璃天人下飲蒲萄露花神夜泣向
天訴謝爾蒲萄數尺陰不如寸草同此心

送人歸烏傷

湖邊老屋墻壓籬饑鴉啄雪枝上啼湖中葑田
產菰米菖蒲花開照湖水蒺藜老翁呼不起曾
入東宮教皇子文雅風流俱掃地瓦磚擲人老
兵醉後園小坊近市塵借人樗蒲無稅錢君歸
故里何所憐

覓紫芝

少微昏見紫鐫中山深夜氣光流虹青芝獨產
林下石染根溼雲如紫漆天門夢斷路初回山
鬼守根不敢食銀泥徹鎖守者疲老翁持呪取

夜歸明當食之間鬼哭對爾洗腸還入腹

雨後海棠

春光搖搖一萬里野粉殘英空蜀水天人愁溼
紅錦窠萬里移根淚如洗蒼苔裹枝雪墮地雨
中間有西南使化爲黃鵠凌空青開時銜花落
銜子綠章青簡下蓬萊滯魄游魂恨未已至今
鸚鵡啼猩紅不隨明月堊空中

登廣靈寺塔望南高峰

寺碑記太宗
潛藩時事

城池風烟杯渡僧廣靈孤塔懸晝燈塔燈上齊

南高雲南高峰巔祠歛神靈旗肅肅捲青雨結
喉巫陽能楚語回望人烟塔峰北惟有空城臨
水滸赤蛇不神江海翻數澤狐狸作巴舞當年
介弟階防禦玉鸞青鞭上天去

雪度

千山萬山雪崔嵬欲流不流水涸涸蟄熊出穴
戍草短客行心急夢歸來南園桑柘未生葉南
渡溪頭不可涉朝種木蘭拔爲楫

閱方史君登行狀

九江黥王所理州衰年杖篁作諸侯唐人舊隱
衣冠盡歸闖宮潮不得觀天吳舞罷塵土飛廿
載腥雲寄空殞當年電隙豈所問生死身名惟
轉瞬睦人共說方饒州番人作廟祠唐震

食齋歌送別方安道

山中薺發燒餘地與君爲客同食薺薺長故居
收燼餘君歸食薺如食茶我家甌越草應出土
溼烟青歸不得相逢舉酒復爲別對君盤中不
忍食

夜宿南明縣齋

朝陰扣舷清剡曲
暝投天姥峰前宿
桂虫食葉露溼身影落
莓苔雲矗矗
天風吹枝斷
未殊夢尋香
靄來絳車下車者
誰藏姓氏
夜向瓊臺讀
諸子覺來
隱隱聲在耳
月白西南望
爲水

書畫梅花水仙卷

風吹鞞露明微照
芳雲弱植仙姝廟
髻鬟零亂在枕函
月裏羅浮夢中到
鮫綃拂塵蟬翼隔
窓露凝寒惟影入
曉來坐對殘空標
翠翎不見額

黃濕

小元祐歌寄劉君鼎

前甲子小元祐
句章褻黑權臣死
端平天子初改紀
襲芳泰陵種蘭芷
當秋淮甸枯草黃
彎弧北向射天狼
狐南星光天狗墮
人蔡生擒完顏王
是年南渡無波浪
月溼珠胎君以降
只今六十空白頭
獨騎麒麟補春秋
天回星周美惡復
人世更傳蔡州錄

句章見月食

穀州見月如魚口沫聚痕銷暗牕
鄆城見月如破臼棄藥含口掛南斗
龍蛇伏氣諸腦空水中睡失群陰母
其間夜禽獨夜啼黑雲赴海同奔犀
市人識母不識父擊柝摧扉救月死
况值蕤賓月十五千神附甲支在子
孤子哀吟離楚尾淚落荒江吊南紀
猶憶秦淮哭日年不敢仰視看盆水

避暑城西觀吳道子畫老君像

溼烟掛龍天海頭角城溽暑如炎州
白氛翳景失樓閣蓬萊縹緲不可求
解衣揮塵子城下地湧青蓮隣古社
卷簾看畫人猶龍矯首見龍還見畫
碧幢畫髮垂過耳弄筆者誰吳氏子

趙安夫北遊求詩安夫韶王孫作詩送之

海雲抱漚海水熱道路征人裹冰雪
憐君獨作千里遊兩把蓮莖手中別
蓮莖刺多蓮葉溼翻爲君衣覆爲笠
汴南淮北多故人馬上相逢淚相揖
故園萋萋長草根遲君歸來洗雨痕
青鞭碧影角湖曲芳夢猶到韶王孫

遊暑崇法寺

城南古寺涼生處草色遙連孝子墓基局雨生
苔蘚文袈裟晴挂芭蕉樹自昔闍黎脩白業會
君惟與舒王接只今塵土影堂空石上猶鐫麻
紙帖

寶幢山尋黃提刑震舊避地處

甬東寺裏逢陳若雙袖龍鍾行帶索問知黃公
舊避迹寶幢山下生叢薄日惟一食禱先靈不
願拾得不死藥仰天呼號得正終一往不復至

城郭公初著書女立旁公死母亡家濩落予爲
戶曹取公女欲敘因由無與語得來與子行林
莽月落山空識其處

城西廢園

水流向西雨連越鄴瓦耕殘莎草茁誰知當日
夫容園溼路迷城暗車轍夫容青根聯戚里美
人對博蓬山裏潮痕欲上紅露晞知是日高梳
洗起國南禁絕人行道中有民間舊宿草廢園
起岱鳴竊脂寒食始應通祭掃

故園秋日曲四首

空園久閉無人住，城鳥應入巢。其樹食盡滿園綠，荔枝引雛飛去人始知。

茅茨竹外烟火青，杉雞啁晰向田鳴。家家紅鹽殷新杵，綠樹裹劊子如雨。

龍蛇已去荒窟宅，翻藕人人下劍池。岬池藕盡無浮葉，惟有青青榕樹枝。

越王山下霧如雨，吹入羅襟楚女啼。身逐千艘落南去，惟有檣鳥飛向西。

有洗舊誥綾作青色，鬻將以爲綠。以緝繒易得之作手卷賦，小樂童求好事書其

後

吳宮輦路傷行客，繭冰壓雲凝碧色。門前新掃染家隣，借人鋪設殘衣帛。宮花剪綾連院號，覆取翻看成一道。織紋宛轉勅字新，知是初誰六尺誥。城霞失彩宮，蘚病中與海圖上衣領。改顏倖售綠，所遭褪藥玄香洗。藍影青綢易得淚，承睫擊筑楚歌無。故業歌殘求書好事人，異代倘

晚髮集 卷之四
傳誥綾帖

廣惜往日

崇真院絕粒示兒宋禮部侍郎謝枋得所作也粵人謝翱用其語爲楚歌以節之其詞曰漢有臣兮龔勝卒際不食兮十四日今忍饑兮我復渴道間關兮踰半月幸求死兮得死苟不得兮無術鳳笙兮龍笛燕群仙兮日將夕風吹衣兮珮蕭瑟駿龍兮寥天行成兮緣畢

崇真院絕粒偶書付兒熙之定之

謝枋得

西漢有臣龔勝卒閉口不食十四日我今半月忍渴饑求死不死更無術精神常與天往來不知飲食爲何物若非功行積未成便是業債償未畢太清群仙宴會多鳳簫龍笛鳴瑤瑟豈無道兄相提携騎龍直上寥天一

飲飛廟迎神引

劍歌兮擊筑芟青兮寥綠夕濟甬兮沉玉步巫今禹孫葺神藩兮楚軍神之乘兮海雲暝芳兮

越呪斬將兮神祐秋零露兮爲溼春集鴉兮神
語風瀟瀟兮滿旗雲之車兮來思

送袁大初歸剡原袁來杭宿傳法寺寺在

德壽宮北今行路及園卽宮舊址

大雷山下鄞江口石湮落星海涵斗莓苔瑣窓
居鬼神散髮天衣夜行酒百年綺語墮凡塵劉
公不還謝公走祗今零落三秋霜猶說先朝人
物數道逢袁家美年少欲挽吳潮歸兩袖自言
學出戴君門又說舒君忘年友舒君白頭爪塵

垢戴君業成衣露肘君來何處覓知音吊古淒
涼無老叟出門擇語歸計餐顧忌慚皇無不有
不如歸食空江槎初生淡菜如珠母風帆送客
來夷洲白蛤青衫談不朽君不見君今宿寺多
鄞僧耆舊能言幾人在隔牆食柏秋麝過廢石
坡隨舊南內

雜言送鄭主簿炎之官昌化

鄭嘗兩請福州文解皆爲詞賦第一

劉先生名肩吾閩中詞賦天下無當年戰藝誇

顏色進士出身兩回得盧公里人正在朝相見
相逢九官宅余時猶弱起慨慷謂此未足榮其
鄉丈夫事業在簡冊要令姓字留耿光繼聞鄭
君年最少人物氣象猶堂堂白鹿山南介公後
禽蛟兩祭獅子王夢魂欲見無由據側荔芭蕉
春復暮時移乃爾來霄間因作廣文求主簿顧
予多病澁語言面垢毛焦着麻布山中乞食城
中歸徵詩送贈非所宜已聞之戍嚮昌化此地
人傳多畏怕龍居嗜燕烟入巢病甲垂欄腥雨

下又聞山鬼吹夜燈來向人家避官舍君持何
術徑往居此無百憂便將天雷斧柄塞鬼穴巫
山鍊鎖沈龍湫砥足自亂不得休豈知從心致
禱動幽隱使龍無嗜鬼無愁不知君能致此否
龍不湏酌以酒鬼不湏祭以肉秋旗卷雨曉案
烟時向縣齋望天目

一作龍不
湏鍼以斨

懷鄧牧

謝豹花開桑葉齊戴勝芊生藥草肥九鎖山人
歸未歸

孟蜀李夫人祠

見全蜀文志

春荒曲薄蠶叢土屈狄歸朝辭廟主官家呼
母恩許歸劔閣并門無處所故衣升屋棺四
繞出門哭子汴州道回腸酌酒三致辭巴蜀
如歸化啼鳥老身不食追爾魂鹵簿臨門拜
上恩

晞髮集卷之五

宋長溪謝翱著

明邑令張蔚然

郡人徐勣訂

邑人郭鳴琳校

五言近體

感舊二首

南鴈去來盡音書不可憑應過蠻嶺嶂聞拊楚
臣膺滄海沈秦壁愁雲起舜陵可堪夢魂在回

首舊觚陵

月離孤嶂雨尋夢下山川野冢埋鸚鵡殘碑哭
杜鵑妓收中使客民買內醫田到此聞隣笛離
情重惘然

雨中感懷

幽齋蒲稗裏夜色入柴荆坐久雨聲絕水深荷
刺生聽猿思楚宿失鶴夢南征白屋青山下何
年返舊耕

桐華

隨風泊釣楂弄日色侵霞燒地不鋤草荒池落
漚麻偶尋僧坐石見落鳥銜花餉粥春寒後多
逢棟樹家

寒食同方行父明中往淶渚舟中作寄東

安方子仁

自食嶼雲薇間居白接籬謁靈隨社到爲客寄
音遲瓢入新城水舟回故渚祠南衣離火浣垢
敝禁烟時

答烟蘿隱者

月落烟霧動遙知夜不眠紫苔生水底白髮坐
巖前野鶴下窺影山人疑問年微吟度小劫勞
贈遠遊篇

送人還蜀

白髮夢鄉國君歸路不迷狀槎秋見草荒棧夜
聞雞月過秦涼北星深河漢西何因到卻返吳
語話分携

憶梁禮部椅

閒庭芳桂叢相憶曙雲空文字能娛老莓苔此

興同青山明月下家口少微東歲晚西庄路柴
門語自工

拜玄英先生畫像

來此得公真塵埃避隱淪水生溪榜夕苔卧野
衣春雨冢侵吳甸荒祠侑漢人微吟值衰世爲
爾獨傷神

哭正節徐先生

淒涼携子女冠佩赴重陰塲井千年事青天此
夜深哀辭山石刻卹典海舟沉里族南薰夢東

都直至今

送汪十

多年隱賣漿此去結山房
掃菌侵花落種松如
草長老期秋欲至貧味水初嘗
歲晚逢樵獵音
書定不忘

槿樹

白犬吠行人西風杵臼新
流香澄宿水曝髮向
秋隣野水依溝盡宮花入帽頻
人家小門徑憐
爾獨相親

悼南上人

翻經卷未終聞打寂時鐘
盡說他身在惟應外
國逢錫聲歸後夜琴意滿
諸峰憶昨安禪處湖
雲起白龍

元日讀老子望瀑作

空山無轍迹懸水下分洪
醉醒聽猶在寒暄色
不同異書天姥秘靈物
乳池空祗憶殘年雨先
流到海中

雨中觀海棠

風吹簾網動對爾惜芳菲蜀雨何人在吳宮
燕歸燭消春粉盡淚溼野香微抱鵲殘青子鳥
啣隨處飛

哭所知

總戎臨百粵花鳥瘴江村落日失滄海寒風上
薊門雨青餘化血林黑見歸魂欲哭山陽笛隣
人亦不存

二月十日

山居少四隣楮葉半爲薪野色生遙念空江滯

此身風濤春憶越親舊晚遊秦獨擬尋雞犬雲
蘿挂葛巾

九日韶卿子善有約不至子靜亦歸桐廬
與景雲飲瀑下

揉藍染釣緡欲老此江濱九日寒泉水他年白
髮身隣州曾約客別業未歸人嗅菊知吾事那
能更問津

呈王尚書應麟

寒風吹鬢影客淚溼衣塵千里見積水滿城無

故人船歌甌雪盡劍舞越花新獨憶絲綸老相
從話所親

山陰道中呈鄭正樸翁

字宗仁號初心温
州平陽人太學釋

禡出身仕
至國子正

楊柳遠天色野風來水涯異鄉同夢客今雨故
人家越樹夜啼鳥禹陵冬落花悠悠江海意爲
爾鬢先華

送毛耳翁之湘南

湘草碧於水王孫尚此留一身行萬里雙鬢集

諸愁月落嶽雲曙龍逝海雨秋可能無事業相
見竟悠悠

寒食姑蘇道中

頻年感烟草荒塚幾人耕吳楚逢寒食山村見
獨行天陰月不死江晚汐徐生到海征帆影悠
悠識此情

別子靜却送之雪

獨往知吾事語離何所求故家無別業殘夢下
扁舟積葉吳宮冷吟猿顧渚秋那能不相待羈

旅負清遊

秋日憶過秦國公主園

野影林樾盡山昏瓦塔齊涼宵風雨過一鴈西
南啼嵐霧洗巾幘井泉生蒺藜傷心拂塵塵衣
淚溼空綈

送道士歸赤松

閒身可得仙諸妄覺他年夜氣浮秋井陰花冷
碧田禮星逢鶴下呪食待人眠叩齒通懸解祠
堂山影邊

送僧之天台

石橋南北路師到動經旬尊者定中影凡人回
去身戴經支錫重作禮納巾頻杯海歸何日長
眉聞四隣

雪水

寒英漲碧沉浴鵠冷難禁太白消秦日中濡接
蜀陰頻湯清洗瘴入茗味如參人世淄澠口應
疑別未深

用韻酌友人憶寄

麻衣拂市塵外事不干貧野氣生寒井天陰壓
莫春閒身分楚鞠白髮作吳人已斲靡蕪徑青
鞋憶寄頻

鼓子花

塵溼西風淚溝西影見君碧衣羞遠日天夢冷
秋雲蔓引山精徑籬依楚女墻海邊逢賣藥采
實故應分

哭宥齋李先生

芾

落日夢江海呼天野水涯百年惟此死孤劍託

全家血染楚花碧魂歸蜀日斜能令感恩者狼
籍樹荒遐

八詠樓

江山此愁絕寒角夢中吹飛鳥過帆影遊塵空
戟枝水交明月動槎泐故州移已薄齊梁士猶
吟沈約詩

至日憶山中客

山村雲外物至朔閏年愁獨客語茅屋樵人共
白頭驛花殘楚水烽火到交州欲隱裂裳帛春

來重結表

懷峩眉家先生

露下溼百草病思生積愁窟泉春洗屐氈雪暮
過樓魂夢來巴峽衣冠老代州平生仗忠信心
自與身仇

哭廣信謝公

自爾迹名姓終喪哭水濱海僧疑見貌山鬼舊
爲隣客死留衣物囊空出告身他年越鄉值賣
卜有斯人

雨夜呈韶卿

相看隴水雲一夕幾回分預恐今宵雨他年獨
自聞野花同楚越江靄雜朝曛不得鋤芝朮逢
樵却寄君

莫春感興

天涯芳草夢此意未應泯獨對風烟老虛爲江
海人漁樵分落日櫻笋過殘春舉世無知己他
生應逐臣

山寺送翁景芳歸觀

弱雲竹水湄葉影碧離離野別如秋夢他宵獨
爾思林殘西域果鐘動下方基可得朝還暮相
看長在茲

寄朱仁中

聞君經亂後居處畏山顛家在聚如客糧餘食
帶烟戍鴉分落日燒草共殘年因憶先丘隴于
今是極邊

遊釣臺

古臺臨釣渚遺像在蒼烟有客隨槎到無僧依

樹禪風塵侵祭器樵獵避兵船應有前朝蹟看
碑數漢年

西臺哭所思

殘年哭知己白日下荒臺淚落吳江水隨潮到
海迴故衣猶染碧后土不憐才未老山中客惟
應賦八哀

江上別友

相看仍慟哭欲學晉諸賢戍近風鳴柝江空雨
送船翔雲侵別色南雪憶歸年擬共鋤青木無

為俗事牽

題翁徵君集後

樵獵識冠裳何言志四方離秦風日冷過楚薜
蘿長野夢違徵詔衰年枉薦章故山唐室晚應
種木為糧

除夜聞雷

牢落長為客殘年獨擁衾燈分寒夜火雨過震
餘陰搗藥滋玄髮書符厭黑衹相看故鄉淚不
敢效吳音

元日枕流亭聽雨

征鐸殘年雨吟聽憶到城愁雲侵歛盡夢日向
吳生藥產難離性灘流不掩聲他宵樺燭飲因
想此中行

春日寄書代鄉人答

滄江失釣緡白社苦吟身風雨他年別干戈舊
國貧春祠占遠夢臘市憶行人故壘夫差地遙
知哭為親

人日雪

連年逢此日寂寞在山居故國雲歸盡高杉雪
下初陰霾占戶口雷電失天書可得俱無事清
吟始晏如

早春寄嶺海流人

短褐隨南賈衰年異壯遊龍旂虛左个鴻影別
中州晚避高麗使春乘百濟舟王孫與芳草相
憶可能留

過孫君文舊避地處

相逢還自失相見盡天涯隣壤初移戍空山此

寄家剪茸春過鹿伐竹舊燒畚去後餘荒槿依

溝結影斜

桐廬志
作結屋

春日遲子芳遊烏龍山

烏龍烟靄北君去爲親留綵舞初離席音書缺
寄郵兩登人日冢槎別客星洲應有他宵約相
從及此遊

春和毛益亂後經太白墳

遙知風雨後明月溼江蘿幾處如寒食荒流空
莫思雨耕侵壞塚春網得沉碑若起論茲世先

生何所爲

憶過徐偃王祠下作

徐王遺蹟地花落舊巖阿山鬼下茅屋野雞啼
苧蘿別祠江路見疑冢草間多寒食思家客空
村記所過

山驛送春

逢春憶舊時愛着舊春衣雨別如知處天涯應
共歸驛花留客盡帆日聚鴉微歲歲子規鳥寄
巢於此飛

蜂

蛹黑春如翳寒崖舉族懸撲香粘絮落采汗近
僧禪聚暗移花幄分喧割蜜烟閒房無處着應
架井泉邊

僧池青蛙

隱見多無定時開一道萍瘦分荷背白身帶鮮
文青吐雹收寒井隨僧入淨瓶栢壇祠后稷應
想作龍靈

夜宿江山寺

寺圖接異境僧影溼香烟落月安禪處翻身置
縣年天河當夏白泉水入杉懸到此懷甌越空

家寄海邊

宋藝圃集翻
身作翻經

雪榻瀑布

漱石清塵暑雲深畏解携寒巖蕭寺下縣水薛
陰西鳥浴溼棲樹花流晴下溪謫龍聞呪起竒
服反初笄

虎石

寺深留片石山雨長苔新昔日栖禪處遺風想

至人錫前行虎獨鐘後到猿頻越客因逃暑於
茲喜掛巾

寺南小池

寺南䟽小沼堤隱獺行踪杉影動寒水夕陽藏
半峰清涵落鳥毳寒怯病僧容聞說初開日鉢
盂盛養龍

夏夜山房會賦得竹禽

入竹雲初翳餘更警露禽羈雌迷故侶涼意滿
西林雨宿移枝暗明翻下籜深微吟觸幽興離

思不能任

芭蕉雨

吳楚燈前侶芭蕉海上身涼宵知過雨病葉與
羈人白屋愁看晚滄洲宿語貧西南多苦竹應
與越禽隣

中秋龍井翫月

逢秋月再圓不與復休眠腦滿龍魚夜精藏樹
石年嗅衣腥在水窺戶影疑禪長嘯望參伐行
來精舍邊

夜坐呈韶卿

脩行吳楚間鶴去杳難攀衰世已如此愁身更
入山巢居避太歲藥飯救羸頽故友在江海相
思不得還

韶卿往烏傷寄劉元益

他日憶逢君林中訪惠勤鹿麕行處見流水別
時聞草沒秦人家山通越國雲音書年歲失莫
訝白鷗群

寄贈王僉判龍澤新之官廣陵

多君孝子里雲物尚依然歲晏木葉下月明湖
水邊看圖頰女分對策亮陰年到此若爲別猶
言贈馬鞭

十日菊寄所思

離菊是秋隣青蕤幾日新忽逢初過節相憶早
衰人囊枕離湘溼分盃度嶺貧想應無事業遙
念更沾巾

巳丑除夜

鬢絲殘雪影况復在塵埃暮色隨鐘盡年光逐

水來隣浦燈下索鄉夢戍邊圓明日聽春雨渡
江登越臺

元旦立春

椒柏多年樹閒庭憶粵鄉發春當獻歲爲客未
休糧飲後憐衰齒行南避忌方星周元朔曆時
運可能忘

寄育王賢上人

予今秣老身從昔少埃塵失蜀年爲客居山石
作隣南遊宗竺法西語問巴人開戶藤花落多

浮茗梳春

海亭夜坐

孤身滯海垠暑溽上南雲歸日喜秋近愁人畏
夜分坐涼依井氣眠溼動星文故友在山北音
書不得聞

魯國圖詩拜序

翺嘗乘舟至鄆望海上島無數其民多卉服
過蛟門登候潮山被髮楚歌歌罷輟復哭思
夫子浮海居夷之義至定海學故石刻盡什

泥滓中新刻復闕茸卽怏怏乃汲水洗故刻
得紹興間邑令趙所傳魯圖自云齊梁父諸
山川至洙泗間巷里廟社并墓歷歷如指諸
掌遂摹其本歸過浦汭方君景山與栝人吳
思齊率其徒爲講經社得思陵所贊夫子像
揭于庭朔望拜進退興俯殊習乞翺所摹圖
與像對翺喜而歸之且書其後爲之詩曰

秋風嶽下城海客見圖新樹入舞雩里水來浮
磬濱東封餘輦路西狩問虞廷被髮逢夫子狂

歌作放民

智者寺見金華府志增入

流水北山北芙蓉峰影長
看花春到寺數竹午
過廊匡石侵衣碧山雲
沐髮香老僧呈佛骨見
畢下胡床

晞髮集卷之六

宋 長溪謝 翱著

明 邑令張蔚然

郡人徐 燠訂

邑人郭鳴琳校

五言排律

雨宿太白

有阜陵書太白
名山賜僧了朴

城中家斧冰此地絕炎蒸
天食青童捧龍居白
氣升暗燈猶宿火寢服尚
衷繒客話從前事書

傳入內僧風流今獨盡雲物老相仍淨榻搜涼
卧危闌入醉凭雨師行下界鳥夢識中乘明發
甬南去他山逢智弘

中秋憶山中人

茲夕發清嘯爲君楚舞終西風五陵夢涼露九
宵中野邏烟常起溪流榜不通天陰無乳兔林
盡見飛鴻溼溼雲垂髮九九樹偃弓劍歌玄武
莫塵語白鷗空稔有淮南淚應沾青桂叢

仙華山招隱

黃帝女昇仙處山下有昭陵祠獻陵賜額猶
在

軒后悲蒼劍神娥下玉簫攀髯初失夢遺蛻上
凌敲碧墮升棺影青分產柱苗山精依鹿竹天
雨溼雞翹有約成孤憤無人重久要秦龍因姓
氏使鶴語軒輶冉冉將終老冥冥不可招無書
寄青雀有恨在中條

野霞觀瀑

他年疏上浮早日此中投汲飲當魚入垂輪卽

虬遊淨祠無血食
暝雨不腥流僧語皆前事
人來盡別州草諳長過雪
沙犯欲捐湫至竟何依
止蒼茫難禱求

採藥候潮山宿山頂精藍夜中望海

蛟門南去鳥此地望迢迢
積溼侵幡黑生寒入
夢飄見燈歸舶夜聞偈
解衣朝土植皆爲藥
山枝不滿樵暗光珠母徙
秋影石花消擬候槎
回漢寧其客老遼却尋徐
福島因問秦皇橋於彼
看日出羽旌焉可招

夜宿雪竇上方

師竇師剡人住邊
支道林買山隱處

眠山枕斧柯獨客愛盤阿
畏日生塵夢尋仙到
鳥窠下方聞夕磬南斗挂
秋河寢服侵雲卷
頽泉通瀑和竇分
滄海月禪入沃洲
歌此地精靈聚
中宵弄薜蘿

晞髮集卷之七

宋 長溪謝 翱著

明 邑令張蔚然

郡人徐 勣訂

邑人郭鳴琳校

七言絕句

島上曲二首

皮帶墨鱗身卉衣晚隨鬼渡水燈微石門犬吠
聞人語知在海南種蛤歸

夫招賈客歲經遼自到城中賣織綃却買鉛華
采珠母檳榔露下月中調
俠客吳歌立秋日海上作

潮動秋風吹牡荊離歌入夜斗西傾
飲飛廟下
蛇含草青拭吳鈎入匣鳴

小華陽亭

勾越山中長木蓮華陽仙女此餐烟
松花飄落無尋處都在徐君劍樹邊

細過臨安故宮

見西湖志增入

複道垂楊草復交武陵無樹着凌霄
野猿引子閒來往覆盡花間翡翠巢

隔江風雨動諸陵無主園池草自春
聞說就中誰最泣女冠猶有舊宮人

禾黍何人爲守閣落花臺殿總消魂
朝元閣下歸來燕不是前頭鸚鵡言

紫冥宮殿燕流霞今日淒涼佛子家
寒照下山花霧散萬年枝上桂袈裟

雨中怨

妾在江南家楚中憶君月落雨聲空夜來入夢
君無語落月同看雨不同

晞髮集卷之七終

晞髮集卷之八

宋 長溪謝 翱著

明 邑令張蔚然

郡人徐 焞 訂

邑人郭鳴琳校

遊仙華巖麓記

出月泉至仙華巖麓十五里至巖二十里蓋予
向所記若芝掌擎空而立者故老相傳以爲下
有穴與鼎湖通嘗秋夜聞水樂及擊石聲月高

風遠復不知墮在何處將至二三里山類藥
壺倚巖側雲嵐草木相掩映日東影射其上遠
望氤氳若丹光浮動疑是甲別有一天地也巖
之麓曰鄭村者友人方君韶卿廬焉地馨芳草
蘭梅辛夷山礬俗呼山礬鄧花鄧與鄭音相近
故以名村環左右無他族皆依巖作屋互向背
巖爲黃帝少女脩真之地垂四千年始民築祠
其上以雨暘禱輒應有欲移祠于麓以便民禱
者一夕風雨大作飄于盥爐幡幢所欲移處瓦木

石隨晦冥雲霧飛空下跼跼有聲今祠有茂陵
旌額信不誣也祠之南二百步皆古木裸藤棲
烟霏霞鶩風颯立皆五色分散獨被髮如人立
又有藤結子苦蓮房纍纍而下益蒼碧可愛行
且倦憇古道觀中夢青衣掖一老人至與予言
海上方及導引事甚悉且曰穹壤間無愚曹仙
人凡知古今不爲所縛翛然塵外者皆得仙子
欲以人世仙乎後二年日浴見我扶桑東言訖
乃寤有鳥自西南來綠衣紅距止藤上迴翔審

顧若欲有言于臆者方君謂予子其訊焉以記
觀之老道士年九十餘言嘗于海上見之今四
百甲子矣蓋么鳳云是爲記

自巖麓尋泉至三石洞記

至巖麓止十日散髮空翠行且吟顧謂方君得
流泉瀧瀧漱石齒吾二人以耳枕之以洗吾悲
何如方君指出間流泉故道皆達麓而來謂其
源自藥壺山出山之愚民辟田其背盡激之過
顛以故沾爲陸者不知其幾年無有能復之者

乃與余行二百步至激泉處由激泉而西百五
十步皆曲溝斷石民橋其上有草類菖蒲而小
無脊一寸皆九節蓋楚南謂之蓀又沿溝行九
十步亂山如蹲厓傾石立注者凸者跂者伏者
仆且僵者散而布者如羝之乳如鹿之奔如鼠
之飛如鳥鵲之俯啄如兔之自吐其子猿猴之
垂藤而飲于水也如雞犬之馳于畝而仙也其
變恠峭特予無以詰之山之僧作亭道上泉出
于藥壺者赴焉同遊括蒼吳子善韶卿之弟君

實子肖翁皆掬泉于泓漱且憩有泉鳴林薄間
斷續相應類金奏闕而石聲間作又有縹緲益
近若浮雲飛絮遊空而下殆不可窮其狀聞唐
有僧名而仙行者貞觀間自南麓來結廬于此
寂然自言千七十歲有奇蓋出於周末也廬爲
寺又五百年因往觀焉其碑記僧所說鉛汞事
乃效晚唐人詩獨不作秦漢以前語亦不可曉
遂由寺之西捫蘿而上得石洞巉 爽噤可坐
數十人視巖前樵牧路如線往來負且牽皆交

擘不相忤又東行抵相對距巖趾得二洞其一
溫然如春可久坐自外望之若無有者其一空
迴寥廓聞人語如投珠于壺滴泉垂草雜飛蝠
續之蒼碧欲動石平潤可抵處十數各倚梯拂
蘚題詩其上逮暮猶沾沾忘歸窮泉源直抵藥
壺頂望兩山墻立石飛聳欲墮可爲亭者一處
礪中立石可爲橋接西巖者一處洞傍可爲屋
若園各一處蓋居于此者日遊而不知予與二
方吳君得之若行外國遇異人出奇玩相飲宴

皆世所未有故書以遺後之好遊者俾有考且屬韶卿居焉

月泉遊記

余少慕初平叱石事知婺有金華洞瀑泉之勝而未知有月泉也月泉在浦江縣西北二里故老云其消長視泉之虧盈由朔至望投榜其間泉浸浸浮梯而上動盪芹藻若江湖之浮舟擁泊于岸視舊痕不減毫髮由望至晦置竹井旁以常所落淺深爲候隨月之大小畫痕竹上當

其日之數旦而測之水之落痕與石約如竹之畫視鬢間滯萍蘚枯青相半殆類水退人家日蒸氣溼墻壁故在而浮槎游枿棲泊樹石隱隱可記予與友人陳君某至適望後二日陳君指萍于草以爲斯泉虧落之驗蓋冲漠朕兆間盈虛消息之理與山川呼吸往來之氣相值而不爽也如此非必有神物主之如雜書恠錄所謂巨魚吞吐云也泉傍舊爲堂祠朱呂二先生環闌楯甃上環詩亭上四顧烟雲竹樹復環泉若

亭不敢左其東北之山曰仙巖者遠望類芝草
浮空而立若皆有所待于斯泉而向焉者予方
謀日遊其間與月約盈虧泉約消長與山約無
盈虧無消長且來今以老吾詩有述仙巖之遺
迹約余遊巖之麓者將歛鹿鳴之引以擬笙鶴
陳子欲窮山中之勝而憚以足赴目乎余欣然
從之書泉之本末以記茲遊之始

粵某山蜂分日記

甌粵之南有某山焉跨羅浮挹九疑穴其竇而

下空洞橫亘數千里與勾漏通山之陽其民至
老死而不知歲曆惟以甲子紀日由穴之陰而
南雖甲子亦不書山衆天小鑿石竅繩鍊其上
屋壘繫而下者若冢高者若浮圖戶養蜂分地
蒔花編竹若護蔬果擘杉桐卷之或取雜木剝
其中爲蜂房纔百之一每數日蜂輒有分者置
不問聽其所止而休焉率以蜂之多寡爲家之
厚薄四時旦暮常候于蜂故曆與甲子可無也
蓋衙而知早晚出入而知寒暑四時之花卉不

同而蜜亦異味是其候也至于有事而涓吉亦于蜂候焉濱是山之郡其人皆能言之蜂之分也其日必吉人家無大小貿易偶及蜂分則趣成之事未及辦則以待後之分日至干婚嫁已納采而未迎興作已畢工而未落成皆候焉或父子兄弟分業而居則俟其日時而併用之隣里親戚置酒羸老相與賀數向之獲是而吉者例指以爲盛事蜂移之家若僕若隣無遠近遞相報俾皆知是日之吉不敢隱有販者至其地

留一年書蜂分之日凡百有奇歸而詰曆驗之皆黃道紫薇天月德活曜其星也其不分者非凶星則常日也予聞之始而疑中而信久而驚以愧不知茲蜂之爲何物也且其王生而有髭則爲異舉族附之不敢後則爲忠遭物害而去有相失者不肯附他族必彷徨噬嚙自相枕籍以死則爲貞出則紛然先後奔走之不暇則爲勤歸則翕然集若赴期會而聽號令則爲整食蜜之餘以遺取者不然則爲廉爲房以自居則

爲智有萬以自衛則爲勇脩是四德而又能知
天時以協人事則夫貪賄無謀亂行離次棄君
事仇反覆變詐以取富貴利祿者身爲萬蠱尾而
不鄙雖其形則人也使其居深山中與不使甲
子之民將必顛倒五行以爲民害寧不爲茲物
之愧哉

山陰王氏鏡湖漁舍記

越城東南多隱者居唐迄今五百載賀監宅與
玄真子嘗往來處往往遺迹猶在高標清風仿

佛烟靄中茲爲可尚也王氏別業在城南葦葦盡
得其勝近又于其旁時竹萬箇加以幽花貞石
離立參峙引水循亭爲九曲前置屋如列舟面
鏡湖扁之曰漁舍嘗獨坐及與客對禹山雲氣
冉冉隨几席稍東二百步累土爲坡室方丈曰
小瀛洲水環其外北望州治山蜿蜒澳鮮翔伏
迤演蓋昔人以比蓬萊實與秦望天柱相賓主
而是洲適中焉則茲名不爲過負城田可數十
頃春夏之交水彌望洲小益浮艤榜其側含嵐

浴暉頃刻殊狀不知天壤之有瀛海也余嘗一
再造竹下良久主人晉衣冠迎客子弟儼侍立
語久益親俾予爲文識其位置次第故他不遑
及或謂予公家世蓬萊下方權貴人趣治第勢
熏灼殊甚草木動相德色獨吃吃不肖歆豔附
麗及茲益守前之爲蓋有昔名人隱者之所難
可書也已是爲記

樂閒山房記

予與吳君仲恭同年生而動息勞佚與凡所爲

事相值無同者予喜泉石物外交遊耳聞足歷
畏不卽居之意少不愜輒復去宜佚而得勞居
里黨人情高下勢緩急張弛事後當成敗慮周
于物而能自愛其所居爲屋日以爽塏靚深以
休息其中宜勞而得佚近闢山爲重屋以眺遠
又屋其後爲楹十有八其位置區畫類隱者所
爲括人吳善父名之曰樂閒山房夫天地間雲
嵐木石崇丘絕壑足以發竒潛老多人蹟所不
到故畸人靜者得與世相忘而自樂其樂恒專

已而不讓至貶食離累垢衣蓬首獨甘心焉今
君之爲此不離乎家人父子之間剝灑盥櫛之
常溫清定省之後飲食滋味之養而幽閒之適
吟眺之美一踰足越限而兼有之可謂樂矣今
君年益老見益定雖不絕物不害爲閒且樂心
有外馳雖閉戶坐不與人世接樂亦未盡蓋君
已知之欲推其究而言解所以名者以予爲文
能識古字屬爲之記甲午九月八日

小爐峰三瀑記

睦土瘠民之巖耕者發土石趾如刃游膏縈如
肋棄而復食故凡樹石竒玩之隣于耕者殆無
完景間有得全其天不毀以休息于此土皆民
之所棄也其勝處的然見于圖經者又爲塵襟
俗駕旦至而睨之毀畫贅疣以醜其外樸斲窟
鑿以死其內與茲土爲仇又有甚于民之所墾
者予至新亭之紫溪得爐峰紫烟浮動旁無雜
植膏肋之地以爲之累而又見遺于圖經不爲
人所知故得歸然以存水南出經其趾雜苔藻

不染他色友人翁君世居其下因約予賦詩聞
有龍門瀑布者相去復不遠由溪之別澗行三
五百步水皆西流予謂水于天地間西行極少
所產必珍禽恠石與有道者居焉故三萬里邇
風而西卽其大者遂相與躡足蒼苔水石間有
巖穹窿如門落深瀑數十丈下爲潭浴石蒼碧
類白虹飲于井而蛟龍搏之者旣掬泉嚙且卻
毛髮起豎由穹窿捫蘿而上望雙流繞麓石益
深翠日且晚各賦詩岸幘乘月而歸約九日尋

源至其頂如期携酒挿菊溯雙流蓋東古藤青
壁殆非人境泐溝溪二百餘步地稍峻泥如沙
欲流者數處仆且起亂石雲浮烟嵐薄林木片
片欲斷足相趾而進不敢視稍間斷前足已遠
後者望前者如乘雲空中遺影在地進至峽得
一瀑自巖下爲三級流乳成池四顧巖壁木根
翠色欲滴衆客青簔白帽浮杯乳上舉酒酌水
遺肴核其中樵童牧豎觀以爲異復登亂雲上
稍南一石欹嵌飛動瀑蜿蜒如舞白虹而下涎

沫轉棹予無以名其狀復緣厓至頂望乳池上
復二級流乳叢薄中草木皆芝木香蓋峽中所
望而未見者明日復由前峽登前壁望上級垂
蘿裊溼蘚下與瀑屬歸而定其處爲三瀑識其
可爲亭者四曰放鶴在瀑頂曰穹石在下瀑浴
石旁曰可嚙在上乳池之下曰弄月居亂雲之
上可爲橋者二跨中瀑曰玉峽居兩瀑合流曰
雙硤爲圖遺同遊者謀之不欲竅鑿櫟斷贅疣
焉以累茲山始榜蕙葺葑以備藏脩種梅爲本

瀑旁爲泥丸散桃巖上下春秋臨流濯髮夏乘
風長嘯頂上冬看冰柱如是以老吾年足矣橋
與亭以某月經始先紀其事與同遊各賦六詩
書于後後二年亭成而刻之石

遊赤松觀羊石記

金華洞爲初平叱石處余髫髻而聞之髮種種乃
一至而叱石處復不在金華洞未至洞十五里
有山曰赤松今爲寶積觀觀傍祠二仙卽皇氏
兄弟是其處也石故在山之巔變恠抵牾宛然

明長集 卷之八
如羊多爲樵牧及好事者取去道士拾其餘蓄
觀中予得借而觀之者三處其一天井東僅十
數角嶄然群伏且起狀無抵觸意苔蒙茸若草
藉地可近而玩其一並曲池之北岸累石爲山
參布伍列犬牙其上卧者十八九伏者十七抵
者蹶者十五履險而跛者十二倚而齧跪而乳
者十一若觀古鼎彝尊之蹟于石形不求完而
意自足其一積小坻位置加密跂伏齧乳抵蹶
與前變態畧同復有拱人而立者竒崛特甚道

士易以他名使不與群羊伍予曰是不可易左
元放之遇曹瞞其化而爲羊與茲羊之化爲石
是或一物也今而後觀諸石若憑而遊若蛻而
休茫乎日與對而泊不知所求其有不復化爲
是物乎道士顧笑衆岑寂起立若植以予言爲
然故書以啓後之遊者其所觀二處道士曰倪
守約唐元素王德厚云石去初平仙後若干年
爲樵牧好事所取及移來此又若干年道士悉
能言之于遊者非有所係故不書

金華洞人物古蹟記

金華洞去縣三十里洞有三道赤松東西鹿田
上而下遠望若建瓴水及至復平夷無他險道
北山由上下氣喘喘不暇息然亦不覺勞苦下
洞之右爲椒亭亭上望洞口若缺甕石上青黑
洞內外分爲兩由缺甕入可坐數百人有穴如
墓願水出自願入地中下山復不知何處由願
入卧小舟僮僕篝火傳舟進至岸寥泐空廓行
颿颿有聲由右轉左復從願出洞外洞外二百

步至中洞口自洞口東炬圍旋入地底一出出
良久有二里至上洞上洞分左右爲兩變恠開
闔爲體各不同而天地山海人物之類最多歸
而以其類識之總六十有四併十二而五得五
十七爲仙人藏身處一石黃色亘地在外洞右
爲道人比肩而立各一在外洞上頂旁爲大士
垂珠纓絡箕踞而坐者一在石之右凡爲人之
類四而形影小大有不犯焉爲碧桃枝實纍纍
垂下者一處在于外洞頂右爲石筍拔地而玉

立者一斜上蒼紫而迸于地者一在洞中水簾
後凡爲植物之類三而苞萌蕢實有不犯焉爲
蒼龍首尾相應者一在外洞左右對爲龍角鬣
尾及爪痕如玉者各一在內洞右爲蒼白兩龍
鱗鬣欲夾石梁飛度者一在上洞左角爲右黑
龍而白蛇自背繞其脇者一爲蟾蜍三足一在
石門限北爲遊魚布影于石者一在外洞頂西
北爲蝦蟇匝地者一在墓頤蓄水傍爲石蜂窠
房牖如綴者一在蝦蟇石上頂爲石獅子爲石

虎而虎者各一在雪山前爲大小象脚大二小
一在內右轉左凡爲山海奇恠之物總十有四
離而爲二十有一而鱗介羽毛飛走有不犯焉
前後雪山一在上洞爲雲巖五色二在霜石上
稍西及上洞右爲仙人望月者一在墓頤受日
處正圓三五夜爲日影射石壁類月光在地者
一處在上洞石之左爲北斗七星窠一在外洞
外之左凡爲在天垂象之類九不犯二三焉爲
天涯海角各一在下洞內右消臺一在內之左

爲石紋細湧如水波浪痕者二在下右上左爲
仙人種玉田者一在下左丘畝步角可數爲天
地一在上洞天扉下石井一在上右角下皆深
黑莫測所窮凡爲在地之類八不犯一二馬爲
石門限溜室窓櫺各一在石限內爲石柱一在
大小象脚下石室一在水簾石筍後落沙石盛
之輒滲下不溢簾後束炬可立先出者視互出
入者與束炬立簾後者若神人然石梁上在天
池左可數十丈爲天扉中折日光射其內者一

從洞背尋折處復不可見凡爲棟宇之類七而
求其犯者無一焉爲石鐘鼓自洞頂懸而虛其
下而聲各如其所名者一在仙笠東爲仙笠一
在鼓西爲筆格而山立者一爲硯滴石穿溜若
引蟻鑽珠而洞頂滴泉正當其處一與筆格自
爲左右爲懸鐘寶蓋類雲氣結而天花兩者一
在鐘鼓南爲天人挂衣痕感感如新者一在石
床右石床上在衣左爲小挂衣一在外洞黃石
上側爲水簾飛空而下類珠翠綴成者一在中

洞旋石中爲小懸鐘二在中洞及上左凡爲噐
玩之物十有二而求其犯者無一焉予嘗喜獨
行山水間遇古蹟竒玩見于外有過此無不及
也至內觀若神犀寶鼎燭影圖物夔龍罔兩天
地山海之藏旣莫得迹其狀此爲尤絕友人方
君鳳旣集爲行紀志所變恠先後有差予嘗欲
與善畫者日夜相對盤礴其下寫爲圖分合數
面求書尾于山林畸人靜者傳之後數百年以
爲希世之寶而力有未能輒敘其槩而爲之記

凡以昔之得遊而觀者數千百年旣不可知其
人而往矣後之欲圖而觀者數千百年豈無有
與我同志者其于此庶乎其有考也歲屠維赤
奮若月孟陬粵人謝翺記

鹿田聽雨記

鄉余見南嶽僧言嶽頂望日出海看雲生樹石
與巖屋聽風雨曼異人世嘗疑其言之過比遊
金華之北山宿東西鹿田夜聞風雨聲滃鬱滄
隘琤琮澎湃浙浙浮浮泠泠琴琴或散或哀或

赴或休或射或激或凌或瀝或淫或淫或益而
溢其過虛若乘其擊實若盈其舉朽若勝而振
于葉也若憑其赴于壑也若崩其回旋于空而
薄于軒窓也若濤風擊舟而擁于敗蒼是不可
行而詰其名也蓋其地近洞天山川鬼神虎豹
蛟龍虫蛇罔象烟雲水石之所聚故聲鬱而不
散其石虛窾竅坳圻圻圈洼曰崕崕口鼻之所
出故其聲泊以深其林木藿霏枯新堅脆榮實
瘿液之所生故其聲泛以奮其勢之來也殊方

其席而怒也殊力其散而游于物也殊值故能
若無若有萬變而不窮而畸人孤子抱膝擁衾
感極生悲而繼之以泣故其聽也獨真于是信
卿之所聞于僧者不謬然僧之聽乎此與人世
異而吾之聽此復與僧異知吾與人世與僧之
所以爲異則茲遊也將必有與吾不異而深知
此聲者乎是爲記

遊石洞聯句夜坐記

藥壺山其初總謂之仙巖余取其狀類藥壺且

竒崛特甚故別名之三石洞之遊直抵其巔拊
摩蒼蘚擷靈草若芝木而莫辨者歸于洞掬乳
泉嚼嚙之山之僧曰師遠者嘗遊方之外喜夜
坐見予抵掌荒落蜉蝣蟬蛻以爲異邀宿寺中
設燎露坐望藥壺諸巖連洞如井河漢衆星挂
其上小者欲飛大者欲滴環視北斗無見者以
問遠遠云諸巖藥壺直西北最高北斗墮其脇
故經年未嘗一見獨蘿陰缺處見南斗歷歷衆
皆瞻仰嘆異遂以足歷目睹日夜所得沾沾自

喜若恐失者與予善韶卿君實默識以一人糾
之由甲而乙各受其意以爲句有次第語不遠
意責在衆意舛而語自工以責糾者是夜將分
有影射西巖初如珠光走盤浸大如石湏臾光
遍樹石閃閃飛動視東巖月復未吐益信仙宮
深處所見日月光影徃徃與人間不同無足恠
也復續聯句思益苦遠見無能爲相與不自知
對坐兀兀達旦蓋先夜與予善宿韶卿家因讀
韓子孟聯句舉此爲例每得一聯書于紙有未合

衆爭句糾爭意始各執其是不相下執愈爭愈力卒至于當而後已既成以爲善故是夜復如之先得韻四十四後二十八與題洞諸律絕句皆楷書爲卷復相與正其重複踈漏者竄若干定若干是爲記

睦州詩派序

唐代言詩在江東者戴發運叔倫許刺史渾潤人丘員外丹丘庶子爲顧著作况陸處士龜蒙姑蘇人孟先生郊嚴處士憚釋子皎然吳興人

駱少府賓王張處士志和僧貫休金華人賀賓客知章四明人嚴長史維秦徵君系吳舍人融僧澈越人張處士祐金陵人吳韶州武陵廣信人羅給事隱新城人項少府斯天台人薛補闕令之歐陽生詹閩人其他雖遺逸不可槩舉率郡不過一二人多者三四人惟新定自元和至咸通間以詩名凡十人視他郡爲最施處士肩吾方先生于李建州頡喻校書見世並有集翁徵君洸有集藏于家章協律八元徐處士凝周

生朴喻生坦之並有詩見唐間氣及文苑諸書
皇甫推官以文章受業韓門翱客睦與學爲詩
者推唐人以至魏漢或解或否無以答友人翁
衡取十先生編爲集名曰睦州詩派以示翱翱
日子睦人也請歸而求之母貽皇甫氏所云舍
舍
近而尋遠則詩或在是矣癸巳夏五書雙硤精

登西臺慟哭記

始故人唐宰相魯公開府南服余以布衣從戎

明年別公漳水湄後明年公以事過張睢陽及
顏杲卿所嘗往來處悲歌慷慨卒不負其言而
從之遊今其詩具在可攷也余恨死無以藉手
見公而獨記別時語每一動念卽于夢中尋之
或山水池榭雲嵐草木與所別之處及其時適
相類則徘徊顧盼悲不敢泣又後二年過姑蘇
姑蘇公初開府舊治也望夫差之臺而始哭公
焉又後四年而哭之于越臺又後五年及今而
哭之于子陵之臺先是一日與友人甲乙若丙

約越宿而集午雨未止買榜江涘登岸謁子陵
祠憇祠旁僧舍毀垣枯甃如入墟墓還與榜人
治祭具須臾雨止登西臺設主于荒亭隅再拜
跪伏祝畢號而慟者三復再拜起又念余弱冠
時往來必謁拜祠下其始至也侍先君焉今余
且老江山人物睽焉若失復東望泣拜不已有
雲從西南來滄泖渟鬱氣薄林木若相助以悲
者乃以竹如意擊石作楚歌招之日魂朝往兮
何極暮歸來兮關水黑化爲朱鳥今有味焉食

歌闕竹石俱碎于是相向感喑復登東臺撫蒼
石還憩于榜中榜人始驚余哭云適有邏舟之
過也盍移諸遂移榜中流舉酒相屬各爲詩以
寄所思薄暮雪作風凜不可留登岸宿乙家夜
復賦詩懷古明日益風雪別甲于江予與丙獨
歸行三十里又越宿乃至其後甲以書及別時
來言是日風帆怒駛逾久而後濟旣濟疑有神
陰相以著茲遊之偉予曰嗚呼阮步兵死空山
無哭聲且千年矣若神之助固不可知然茲遊

亦良偉其為文詞因以達意亦誠可悲已予嘗
欲倣太史公著季漢月表如秦楚之際今人不
有知予心後之人必有知予者于此宜得書故
紀之以附季漢事後時先君登臺後二十六年
也先君諱某字某登臺之歲在乙丑云

晞髮集卷之八終

晞髮集卷之九

明 邑令張蔚然

郡人徐 勗 輯

邑人郭鳴琳校

附錄

謝君臯羽行狀

方 鳳

君諱勳字臯羽姓謝氏福之長溪人後徙建之
浦城曾祖景暉祖嘉至其父鑰以春秋學為婦
翁繆正字烈所器重嘗著春秋衍義十卷左氏

明身集 卷之九
辯證六卷藏于家君世業幾冠已行聲試有司
不第落魄泉漳間會丞相信公開府杖策詣公
署諮事參軍其畧見西臺慟哭記後避地浙水
東留未嘉括蒼四年往來鄞越復五年戊子夏
至婺遂西至睦及杭慕屈原懷郢都讀離騷二
十五託興遠遊以晞髮自命爲詩厭近代一意
溯盛唐而上文規柳及韓嘗欲倣太史法著李
漢月表采獨行全節事爲之傳大率不務爲一
世人所好而獨求故老與同志以證其所得會

友之所名汐社期晚而信蓋取諸潮汐嘗爲許
劔錄慨時降交靡者舊凋落盡吳越殆無掛劔
者思集同好姓字年爵居里擇地昔賢所嘗遊
作亭立石他日示宿草不忘意其遊蹟非勝絕
處不到如鴈山鼎湖蛟門候濤沃洲天姥野霞
碧雞四明金華洞天探幽發竒所至卽以遊錄
述所賦詠多昔賢文字所未及持以與人若載
異寶歸者遊倦輒憩婺睦之江源月泉仙華巖
小爐峰三瀑布復愛子陵臺下白雲原唐玄英

處士舊隱有終焉之志且欲爲文冢瘞所爲槁
臺南甲午寓杭遺人劉氏女以女至是買屋西
湖日與能文詞者往還乙未復來婺睦尋汝社
舊盟夏由睦之杭肺疾作秋八月壬子終蓋於
是距生年巳酉四十有七矣垂歿時語妻劉吾
去鄉遠交遊惟婺睦間方某翁某數人最親死
必以赴慎収吾文及遺骨候其至以授之辛酉
計聞婺方鳳方幼學吳思齊睦馮桂芳翁登及
弟衡會小爐峰相向哭明日鳳與幼學方燾先

往臺南度可塋地甲子具舟之杭哭諸劉氏劉
循治命候庚午以遺骨歸殯桐廬買山營兆所
度處越明年正月二十八日丁酉窆以文槁殉
兆在故起居舍人范公端臣墓右地名嚴陵郡
以著名卽其地從初志作許劔亭伐石表于墓
曰粵謝翱墓蓋君嘗入剡見戴顓墓表云然窆
之日同生年吳謙志壙其從孫貴以門人虞而
歸婺祠之月泉君遺槁在時舊所爲悉棄去今
在者手抄詩六卷雜文五卷唐補傳一卷南史

贊一卷楚辭等芳草圖譜一卷宋鏡歌鼓吹曲
騎吹曲各一卷睦州山水人物古蹟記一卷浦
陽先民傳一卷東坡夜雨句圖一卷遊東西遊
錄九卷春秋左氏續辨歷代詩譜未脫槁選唐
韋柳諸家及東都五體在集外憶君始至時留
金華山中歲晚爲文祭信公望天末共哭復賦
短歌行以寄餘悲自是與予爲異姓兄弟不忍
離離輒復合每卧起食飲相與語意不能平未
嘗不撫膺流涕也君好脩抱獨刻厲憤激直欲

起古人從之遊其樹立有如此者顧死中年無
後翁衡與余子肖俱嘗從君授春秋未卒業諸
學者經指授率異嚮所能余雖早衰尚擬相從
盡衡霍之勝歸而潛文字以老今已矣能無痛
乎姑敘顛末赴所知求爲銘且以俟後世君子
友人方鳳謹述

謝臯父傳

鄧牧

謝君名翺字臯父延平人蚤事科舉學有志當
世中遭兵火室家散亡購得一子軍伍中相與

竭力生產僅自給屬繇役繁與不堪迫辱日益
憤懣成疾以子粗達時務委而出遊過嚴陵故
舊館焉因娶劉氏其地與婺接故常往來兩州
間積十四五年指授館下生粲然進于文學性
耿介不以貧累人所居產薪若炭率秋暮載至
杭易米卒歲少裕則資遊江海訪前代故實著
家史補唐詩人無傳者三十餘篇傳近世隱逸
數篇歲甲午與杭人鄧牧相遇會稽結爲方外
友牧罕讀古人著述謂文章當出胸臆自成一

家而君記問優贍必欲中古人繩墨乃已所見
不合日夜論辨互相詆及見牧所爲文乃起謝
曰公不肖區區有所模擬然法度高古殆天才
也牧因爲言杭大都會文士輩出予知若干人
盍往見之旬日別去逮牧歸杭君已挈家錢唐
江上問所從遊皆前所聞者其信好學也乙未
秋牧薄遊山水間君病篤望牧不至懷以詩曰
謝豹花開桑葉齊戴勝芊生藥草肥九鎖山人
歸未歸蓋絕筆于斯故同姓善之新與君交最

厚哭其舍累日爲著哀辭東西州故人門生不遠數百里來吊咸哭盡哀奉喪去先是君買地釣臺下將塋朋友無歸者至是君塋焉君生不得志閒居常有憂色語聲甚微鬱鬱不平之氣一宣于文讀之使人悽愴知其弗壽也嬾斃然無依子遠在二千里外存亡不相關可謂窮矣嚴陵士風厚將有集君遺稿以傳後者志且丕沒牧歸悲惋不已誄曰上世之士以文取顯耀而君窮于文痛哉臯父痛哉臯父錢唐鄧牧著

謝處士傳

任士林

謝翱者字臯羽閩人也父鑰性至孝喪母行服廬墓終身不仕咸淳初翱試進士不中慨然以古人倡作宋祖銑歌鼓吹曲騎吹曲上太常樂工習之人至今傳其詞僮有大節嘗布衣杖策參人軍事未幾善哭如唐衢過姑蘇望夫差之臺慟哭終日過勾越行禹窆間北向哭乘舟至鄞過蛟門登候潮山感夫子浮桴之嘆則又哭晚登子陵西臺以竹如意擊石歌招魂之詞

曰魂來兮何極魂去兮汪水黑化爲朱鳥兮有
味焉食歌闋竹石俱碎失聲哭何其情之悲也
所知淪沒碧血濺空山川池榭雲嵐草木與所
別處及其時適相類則徘徊顧盼悲不自已夫
鳥獸喪其群匹越月踰時則必巡過其故鄉翔
回焉鳴號焉躑躅焉踟躕焉然後乃能去之若
翱者章皇山澤惡夫淚之無從也旣客浦汭往
來桐廬人翕然從翱學所爲詩歌其稱小其指
大其辭隱其義顯有風人之餘類唐人之卓卓

者尤善敘事有良史材作南史帝紀二十贊采
獨行秦楚之際月表所歷瀾東西州山水必有
游記當天天下廣大足歷燕魏趙代間遺事故蹟
且涉大瀛海外盡識風物洪濛之初度越子長
矣惜其悲鳴煩促天性固然其亡乎其亡乎士
克克入矍相持解不去憎聞翱翱自若也易曰
浚恒貞凶无攸利翱之謂乎或曰伯夷叔齊何
人也曰古之賢人也曰怨乎曰求仁而得仁又
何怨屈平非怨者耶精神漂散鬼語神詞變幻

不測翽豈平伍耶初翽亡恙時得唐方干舊隱
白雲村建炎四年江端友呂居仁朱翌諸賢爲
文祭臨水之神避地于此翽曰死必葬之作許
劔錄逮疾革語其妻劉氏我死必以骨歸吳思
齊方鳳塋我許劔之地二人果聞計至與方燾
方幼學馮桂芳翁登翁衡奉骨塋如志夫以死
生託人不爽曷日信矣哉其徒吳貴買田月泉
精舍祠曰晞髮處土歲時奉蒸嘗云

贊曰唐宰相董晉爲汴州辟韓愈從事愈激知

已稱隴西公而不姓晉死從裴度度乃不引愈
用愈作吊田橫文以著其哀若翽者夫亦橫之
客也與

謝翽傳

胡不翰

謝翽字臯羽建寧人也家故羸于財父鑰居喪
哀毀人稱其孝宋咸淳初翽試進士不第慨然
求諸古以文章名家元兵取宋宋相文天祥亡
走江上逾海至閩檄州郡大舉勤王之師翽傾
家貲率鄉兵數百人赴難遂參軍事天祥轉戰

閩廣至潮陽被執髡匿民間流離乂之間行抵
勾越勾越多閭閻故大族而王監簿諸人方延
致遊士日以賦詠相娛樂髡時出所長諸公見
者皆自以爲不及不知其爲天祥客也然終不
自明且念乂不去人將虞我矣乃去而之越之
南郵依浦陽江方鳳時永康吳思齊亦依鳳居
三人無變志又皆高年遂俱客吳氏里中得其
餘日以自適一不問當世事髡嘗上會稽循山
左右窺祐思諸陵西走吳會東入鄞過蛟門臨

大海所至歔歔流涕晚愛睦州山水浮七里瀨
登巖光釣臺北向舉酒以竹如意擊石歌曰魂
歸來兮何極魂去兮關水黑化爲朱鳥今有味
焉食歌已失聲哭人莫詰其誰何惟鳳與思齊
深悲之初江端友呂居仁朱翌避地白雲源源
故方干所居在釣臺之南髡率其徒遊焉願卽
此爲墓地作許劔錄及髡居錢唐病革語其妻
劉曰我死必以骨歸方鳳葬我許劔之地鳳聞
許訖如其言鳳字韶卿由太學生授容州教授

治毛氏詩陳宜中當國禮下之命其二子大登
小登受業焉同郡黃潛柳貫皆出其門好獎拔
士有一善未嘗不與之進思齊字子善其學本
之外史陳亮用蔭補官攝嘉興丞數以書干宋
臣用事者言賈似道母喪不宜賜鹵簿責文及
翁顧忌爭不力猶不爭耳又言御史俞浙以論
謝堂去職宰相附貴戚塞言路如朝廷何思齊
雖有寒疾耳聾遇事不以勢移不以貧屈自號
全歸子云

媯仲子曰翰少客浦陽望仙華寶掌諸山從縉
紳學者問翱時事未嘗不喟然爲之太息于是
訪其論著之文翱有晞髮集鳳有巖南集思齊
有全歸集三家者惟翱集備焉其辭隱其指微
入要類其行事是時元新有天下士大夫于宋
事多諱言之鄞江任士林稱翱善哭如唐衢豈
其情哉豈其情哉

謝翱傳

宋 濂

謝翱字臯羽福之長溪人後徙建之浦城父鑰

性至孝居母喪哀毀廬墓終身不仕通春秋著
春秋衍義左氏辨證傳于時翺世其學試進士
不中落魄漳泉二州僦儻有大節會丞相文天
祥開府延平長揖軍門署諮議叅軍聲連梁楚
間已復別去及宋亡天祥被執以死翺悲不能
禁隻影行澗水東逢山川池榭雲嵐草木與所
別處及其時適相類則徘徊顧盼失聲哭嚴有
子陵臺孤絕千丈時天涼風急翺挾酒以登設
天祥主荒亭隅再拜跪伏酌畢號而慟者三復

再拜起悲思不可遏乃以竹如意擊石作楚歌
招之曰魂朝往兮何極暮歸來兮關水黑化爲
朱鳥兮有味焉食歌闋竹石俱碎聞者爲傷之
然其志汗漫超越浩不可禦視世間事無足當
其意者獨嗜佳山水如鴈山鼎湖蛟門候濤沃
洲天姥野霞碧雞四明金華洞天搜竒抉秘所
至卽造遊錄持以誇人若載七寶歸者遊倦輒
憩浦陽江源及睦之白雲邨尋隱者方鳳吳思
齊晝夜吟詩不自休其詩直溯盛唐而上不作

近代語卓卓有風人之餘文尤斬拔峭勁雷電
恍惚出入風雨中當其執筆時瞑目遐思身與
天地俱忘每語人日用志不分鬼神將避之其
苦索多類此婺睦人士翕然從其學前至元甲
午去家虎林西湖上前代遺老尚多存者咸自
詫見翱晚明年乙未以肺疾作而死年四十七
瀕死屬其妻劉氏曰吾去鄉千里交遊惟方韶
卿吳子善最親不翅兄弟慎收吾文及吾骨授
之韶卿卽鳳子善卽思齊已而鳳等果至與方

幼學方燾馮桂芳翁登登之弟衡塋翱子陵臺
南以文稿殉伐石表之曰粵謝翱墓初翱以朋
友道喪盡吳越無掛劔者思合同志氏名作許
劔錄勒諸石未就復爲建許劔亭于墓右從翱
志也翱無子其徒吳貴祠之月泉書院云翱好
脩抱獨刻厲憤激直欲起古人從之游不務諧
于流俗意所不顧萬夫莫回也每慕屈平託興
遠遊自號晞髮子遇談勝國事輒悲鳴煩促涕
泗潸然下士有苟志而氣志得者憎聞翱翱自

若也所著手抄詩八卷雜文二十卷唐補傳一卷南史補帝紀贊一卷楚辭芳草圖譜一卷宋鏡歌鼓吹曲騎吹曲各一卷睦州山水人物古跡記一卷浦陽先民傳一卷天地間集五卷東坡夜雨句圖一卷浙東西遊錄九卷餘倣秦楚之際月表作獨行傳及左氏傳續辨歷代詩譜皆未完所選唐韋柳諸家詩及東都五體詩不在集中

贊曰翱一布衣耳未嘗有爵位于朝徒以被天祥之知麻衣繩屨章皇山澤間若無所容其身使其都重祿受社稷人民之寄其能死守封疆決矣翱不負天祥肯負國哉翱蓋天下士也昔田橫不降漢拔劍自剄客從死者五百人若翱之志其有類橫之客者非耶吾聞之任先生云

謝君臯羽壙誌

吳謙

嚴子陵釣臺南嶧唐玄英先生白雲舊隱西一里是爲踰髮處士謝君臯羽之墓君諱翱福之長溪人徙建之浦城曾祖景暉祖嘉父鑰母繆

氏秘書省正字烈之女君襲春秋學試有司不第落魄泉漳間丞相信公開府嘗署咨事參軍後遊浙東西州登釣臺慟哭公復作許劭錄思集同好名氏築亭立石期衰暮無忘吳季子意且將度臺南爲文冢異日並玄英舊隱老馬扁其會友之所曰汝社義取晚而有信甲午由鄞越寓杭乙未春來婺睦復如杭秋八月壬子以疾終于婦劉氏舍距生年已酉四十有七無子友人吳君思齊等歸其骨買臺南地爲兆域越

明年正月二十八日丁酉窆以文槁殉從初志也君平居與同好情甚骨肉而疾惡如讐嗜佳山水訪故老所至滯留類遊惰士至論誦編刻輒忘寒暑饑渴凡所著述欲直追古人不務諧一世意所不顧萬夫莫回也晞髮本楚詞因以名其集有詩八卷文二十卷憶君始至婺時予二兄尚無恙仲元命其孫貴受業從者翕然予家浦陽江水源延吳君思齊方君鳳爲江源講經社與君汝社合予與君同年生又相好也門

祚衰薄頻年哭二兄今又哭君追念死生離合
之故何能無感愴于斯遂伐石志君年行納諸
壙且俾貴于月泉精舍祠焉吳謙謹誌

宋處士謝臯羽先生墓碑記

鄧椿

先生宋之義士也未仕故以隱名沒而葬此幾
三百年矣世邈代更文獻無考卒葬歲月俱不
可知惟孤冢堙漶于草莽間故里豪傳槁者輒
躡其上而穴之郡太守后峰楊公節推玉泉吳

公慕先生風誼躬詣丘壠誅茅展拜目擊其狀
卽逮而罪之遂令贖鏹立石以表墓道蓋一舉
而兩得也欲垂示久遠復捐俸龔石亭碑墓側
命兩峰鄧子爲之記按郡志先生諱翱字臯羽
閩建寧人宋末文天祥起勤王之師翱參軍事
及天祥被執翱匿民間人不知其爲天祥客也
晚愛睦州山水浮七里灘登子陵臺北向舉酒
以竹如意擊石歌曰魂歸來兮何極魂去兮關
水黑化爲朱鳥兮有噉焉食歌已失聲哭人莫

詰其誰何惟友人方鳳吳思齊深悲之釣臺南
有白雲源故方干所居翱率其徒遊焉願卽此
爲塋地作許劒錄及卒鳳等如言塋之所著有
晞髮集若干卷行于世竊詳誌傳徒撰其跡而
未得其心宋室節義之臣天祥爲冠而豪傑舉
事莫有大于勤王者先生爲天祥客而參其軍
事必志同道合始相爲謀天若祚宋天祥不執
于五坡固將大有爲矣而肯爲民間之匿哉予
知隱非先生志也清風高節自漢而後子陵一

人先生志弗獲伸耻爲夷虜潔身遠引舍陵誰
歸故棄親戚捐墳墓越數千里而投老于此地
雖玄英故居心實慕陵風節而依附之也誌乃
謂晚愛睦州山水夫睦固有丁溪越嶂之竒然
先生計安社稷而區區山水足嬰其情哉况登
臺北向之酹擊石招魂之歌詞旨悲壯蓋痛憤
其主之被執北去故遙望以吊之自不知哭之
失聲也友人之悲亦悲其大志未遂而豈以流
落不偶惜之使當時少易厥志苟畱富貴必通

顯終身不至遺孤冢于異鄉寂寞之境然先生
寧爲此不爲彼諒亦其衷自愛自安青天白日
有不與草木同朽腐者在而可以尋常窮達論
之耶夫始客天祥之門生得其主也終墓子陵
之側死得其所也若先生真有宋之完人矣予
猶有感焉玄英没于唐至宋范文正公繪像祀
之先生没于元至明楊吳二公立石表之未究
厥抱于當時而各見重名公均垂芳于異代百
年之後遇亦奇矣果潛德隱行必久始彰而天

祐忠賢其道終不爽與雖然玄英因舉進士不
第始隱較諸以宋室存亡爲進退者大不侔後
之評先生者當伯仲子陵而玄英非所擬也若
楊吳二公表揚往哲以風勵後人則希文不得
專其美矣楊侯名金當塗人戊戌進士吳侯名
勳歙人丁酉鄉進士治郡協恭多善政邑倅胡
子鎮劉子廷相宋子宥皆効勤匠石之役而樂
爲助者例得附書嘉靖癸丑嚴陵鄧椿謹記

宋處士謝臯羽先生墓碑記

李紹賢

謝翺字臯羽閩之福寧人也績學善文業春秋
屢舉進士不第家故饒貲產累萬金會宋南渡
文文山開府延平詣軍門長揖署爲咨事叅軍
散萬金以給軍資蓋路視君父者一毛猶惜萬
金之擲輕于飄羽顧其愛願者猶有重于萬金
也及文山死義知宋事勢不可爲胡元義不可
事遂棄鄉里捐親戚隻影走吳越間登子陵臺
嘆曰睦州山水佳勝可家也遂脫履焉徜徉于

水聲林影之間或擊石悲歌或倦游作賦大抵
慨知遇旣顛大憤不洩託聲歌詞響以寄其微
人亦莫知其爲文山門下士尋以肺病卒年纔
四十七後無血胤壘土收骨皆友人方韶卿吳
子善業其事墓地名西邊灣孤冢荒涼已作平
地春秋麥飯不上丘壠豪室且獵其上而芻牧
之矣然豪傑之魄千古猶靈迨嘉靖癸丑推嚴
州事名吳勳者暮泊釣臺夢臯羽自訴名氏求
問埋骨舊所吳公遂悉心蒐求復其墓而壠之

建亭立碑封土宜植使忠骸義骨不驚飛塵者
吳公一夢首之也所著有許劔錄春秋衍義左
氏辨證晞髮子集尤工于詩直溯盛唐每語人
人日用志不分鬼神將避之况覓句乎故吳越
名流爭推結社舊有集今皆無傳焉嗟乎使北
風之歌不作則南枝之鳥可歸黑龍之鱗早攀
則啼鵲之血同洒卽其肺腸臍乎偉且烈矣惜
萬金饗士進不得脩文成之業桐水孤踪隱而
托子陵之高然則睦州者謝君之首陽乎語曰

愛山水佳麗非其志也萬曆二年桐廬縣令清
江李紹賢撰

鬚髮集卷之十

明 邑令張蔚然

郡人徐 勳 輯

邑人郭鳴琳校

附錄

宋遺民錄序

程敏政

予嘗讀宋王鼎翁謝臯羽唐玉潛二子者之事而悲之且名不著于史而其平生著述兵火以來又多淪喪獨其倡和稱述之間見于諸家別

集中者猶可攷也齋居之暇因裒輯以傳而附
以其一時意氣相與之人爲十二卷題曰宋遺
民錄序而藏之曰嗚乎甚哉宋待士之厚而獲
士之報如此也江南北矣帝子臣矣勤王捍難
之師相擄且死矣而三子者皆布衣爲文丞相
客初未始都高爵享厚祿也乃獨拳拳思宋之
不置或欲死其主于方生以成其名或欲生其
主于旣死以暴其志或欲存其廟食于旣亡續
其王氣于已斷以求盡此心而不負其主天理

民彝藉之以不泯焉夫然後知宋貽謀之善而
士厚報之可以爲天下國家者鑒矣靖康之末
忠臣義士死者接踵又相與維持立國至于百
五十年之乂國亡主執而猶有如文丞相者挺
然以其綱常之身百折不屈就死如歸以明大
義于天下後世而三子者之志于是誠可悲矣
至今言者每以其名不載史爲恨然予竊觀三
子者之事而得其心矣方其運去物改之後徬
徨徙倚于殘山剩水間孤憤激烈悲鳴長號若

無所容其身者苟可容力就白刃以不辭環而
視之非不自知其身滄海之一粟也而綱常繫
焉故寧爲管寧陶潛之貧賤而不悔者誠有見
夫天理民彝之不可泯也然跡其平生則亦將
求以不負此心而已豈必人之已知也哉而其
志則已光耀研錡于青天皎日之下雖歷萬世
光景常新不與海桑而俱化矣固非若世之淺
丈夫建尺寸之功必待銘之鼎彝刻之琬琰而
後名可求也由是觀之夫三子者豈以史之載

不載者爲加損哉區區孤陋每撫拾其殘編斷
簡而伏讀之其言勁如風霆煒如日星而黍離
麥秀之感溢于言意之表殊使人不能終篇固
以毛髮上指涕泗交頤如見其人于九京凜有
生氣欲從之遊而不可得也矧夫一時相與者
又皆悲歌慷慨之士或倡和焉或稱述焉皆足
以起人心之忠義振末世之委靡百代之下讀
其文想其人將必有任天理民彝之責于一身
而與之冥契神交于百代之上者矣然則有天

下國家者可不鑒于此哉編之末復附以元主
爲宋裔之說一本諸故老之傳聞叅之史傳之
登載卓卓乎可以信後世而無疑蓋又將以慰
二三子者不忘宋之心于地下而宋貽謀之善
之報亦于是乎見焉

跋西臺慟哭記

王 禕

文信公忠義之盛近世罕比其英聲烈節雖使
亘萬世不朽可也謝翱先生公門下士也國旣
亡而公亦死傷悼激烈之情每託于文詞以自

見于是西臺慟哭記作焉太史公曰砥行立名
者非附青雲之士惡能施于後世豈先生之謂
乎吾友張君丁雅好古道取先生所爲記訂其
歲月演其旨意而使之傳其用心甚厚又豈太
史公所謂附驥尾而行益顯者耶嗚乎是其可
傳也已

宋饒歌騎吹曲序

吳 萊

武夷謝翱故廬陵文公客也于是本其造基立
極親征遣將東討西伐作爲饒歌騎吹等曲文

句炫煌音韻雄壯如使親在短簫鼓吹間斯亦
足以盡孤臣孽子之心矣嗚乎尚何言哉初漢
曲二十二篇魏晉又更造新曲十二篇但頌國
家功德不言別事大樂氏失職唐柳宗元崎嶇
龍城山谷之間亦擬魏晉未及肄樂府今翽又
擬乎宗元者也饒歌自日出至上之回凡十二
篇騎吹曲自親征至邸吏謁故主凡十篇云

丹鉛總錄

楊慎

謝臯羽爲宋末詩人之冠其學李賀歌詩入其
室而不蹈其語比之楊鍊厓蓋十倍矣小絕句
如牽牛秋正中海白夜疑曙野風吹空巢波濤
在孤樹絕妙可傳郊島不能過也

謝臯羽晞髮集詩皆精緻奇峭有唐人風未可
例于宋視之也予尤愛其鴻門讌一篇火雲屬
地汗流宇杯影龍蛇分漢楚楚人起舞本爲楚
中有楚人爲漢舞鷓鴣無光雌不語楚國孤臣
泣俘虜君看楚舞如楚何楚舞未終聞楚歌此
詩雖使李賀復生亦當心服李賀集中亦有鴻

門讌一篇不及此遠甚可謂青出于藍矣元楊
廉夫樂府力追李賀亦有此篇愈不及臯羽矣
其他如短歌行秦淮沒日如沒鵝白波搖空溼
弦月舟人倚櫂商聲發洞庭脫木如脫髮建業
水云太白入月魚腦減武昌城頭鼓統統海上
曲云水花生雲起如葑神龍下宿藕絲孔明河
篇云牽牛夜入明河道淚滴相思作秋草婺女
城頭玩月華星君冢上無啼鳥俠客吳歌云潮
動西風吹牡荊離歌入夜斗西傾飲飛廟下蛇

含草青拭吳鉤入匣鳴律詩如驛花殘楚水烽
火到交州夜氣浮秋井陰花冷碧田山鬼下茅
屋野雞啼苧蘿戍近風鳴柝江空雨送舩鄰通
燈下索鄉夢戍邊回柴關當太白藥氣近樵青
暗光珠母徙秋影石花消下方聞夕磬南斗掛
秋河雖未足望開元天寶之蕭牆而可以據長
慶寶曆之上座矣集多臯羽手抄濕字多作溼
蓋從古溼字之省史子堅隸格載漢碑有此字
觀者弗識或改爲沔非

麓堂詩話

李東陽

元季國初東南人士重詩社每一有力者爲主聘詩人爲考官隔歲封題于諸郡之能詩者期以明春集卷私試開榜次名仍刻其優者畧如科舉之法今世所傳惟浦江吳氏月泉吟社謝翺爲考官春日田園雜興爲題取羅公福爲首所刻詩以平和溫厚爲主無甚警拔而卷中亦無能過之者蓋一時所尚如此聞此等集尚有存者然未及見也

榕陰新檢

徐勣

謝臯羽吾閩之福安人所著晞髮集奇語叠出楊用脩以爲宋末詩人之冠摘其佳句猶未盡也如雨青餘化血林黑見歸魂越樹夜啼鳥禹陵冬落花積葉吳宮冷吟猿顧渚秋杉影動寒水夕陽藏半峰又如烏栖鳥啼宮燭秋越女入宮吳女愁陰風吹雪月墜地幾人不得揚州死蒼苔染根烟雨泣歲久游魂化爲碧莓苔鎖窓居鬼神散髮天衣夜行酒人間青烟溼塵鞵藥

曰嗟我壓天夢等句當令長吉避席矣

福寧州志

游 朴

謝翱字臯羽福安人鑰之子徙居建之浦城弱
冠試不第落魄漳泉間會文天祥開府杖策詣
之署諮事參軍及文丞相死遂徬徨山澤長往
不返懷賢憤世遍遊名山大川所至輒長歌慟
哭與杭人鄧牧相遇會稽結爲方外友名會所
曰汐社期晚而信也嘗爲許劔錄慕屈原懷郢
都續離騷二十五篇託興遠遊以晞髮自命嘗

作文塚欲瘞所爲文壘嚴陵許劔之地其徒吳
貴買田月泉精舍祠曰晞髮處士時奉蒸嘗有
晞髮集行世其友方鳳吳謙爲志狀太史宋濂
爲傳

浙江通志

薛應旂

謝翱字臯羽福之長溪人徙浦城侗儻有大節
刻厲憤激不混流俗意所不顧雖萬夫莫回每
慕屈平託興遠遊因號晞髮子宋亡文天祥被
執翱悲不能禁有嚴子陵臺孤絕千尺時天涼

明皇集 卷之十
風急挾酒登之設天祥主跪酌號慟取竹如意
擊石作楚歌招之歌闕竹石俱碎其志益汗漫
浩不可禦視世間無足當其意者獨好佳山水
遇卽恣游倦輒訪隱流方鳳吳思齊輩歌吟取
適至元甲午來家西湖上明年乙未没年四十
七臨没囑其家曰慎收吾骨與韶卿子善已而
鳳與思齊果至與方幼學葬之子陵臺南

宋學士集

宋 濂

濂遊浦陽仙華山問吳思齊舊游處見其石壁

題名尚隱隱可辨故老云思齊與方鳳謝翱無
月不遊遊輒連日夜或酒酣氣鬱時每扶携望
天末慟哭至失聲而後返夫以氣節不群之士
相遇于殘山剩水間柰之何而弗悲若思齊者
其知事君不以存亡異其心者歟

東越文苑

陳鳴鶴

謝翱字臯羽福安謝鑰之子也鑰字君啓習于
春秋著春秋衍義十卷左氏辨證六卷翱爲人
雅好山水所至卽選勝周覽吟詩徹于晝夜當

其執筆時瞑目遐思身與天地俱忘也咸淳初
試進士不第作宋祖鏡歌曲太常樂工肄習之
于是丞相文天祥聞其名辟爲參軍及宋亡天
祥死之翱携酒上子陵釣臺設天祥主于庭隅
再拜伏酌慟哭者三以竹如意擊石作楚歌招
之天下旣亂翱家散亡無種翱乃脫身游延建
潭泉間皆亡所遇旣而復遊臨安過故宮不勝
淒楚作詩四章吟罷伏地哭極哀聞者皆哭居
有頃去游姑蘇登夫差臺慟哭終日反游勾越

探禹穴又北向哭終日遂定居于桐廬嘗以秋
暮載薪炭至杭州易米爲食稍裕卽罷不復載
翱之居桐廬也東南諸公之爲詩者多受于翱
及翱卒無子友人方鳳弟子吳思齊方幼學葬
之子陵臺南魂魄不愧于子陵也其後弟子吳
貴買田月泉精舍奉嘗焉祠曰晞髮處士處士
有集百餘卷皆散逸獨晞髮集行于世

詩數

胡應麟

宋末盛傳謝臯羽歌行雖竒邃精工備極人力

大槩李長吉錦囊中物耳林德暘七言古不多見而合處勁逸雄邁視謝不啻過之

程克勤所編宋遺民錄凡十一人王鼎翁謝臯羽方韶卿唐玉潛林景熙汪大有龔聖予張毅夫吳子善梁隆吉鄭所南鼎翁嘗爲文生祭文信國毅夫卽函致信國首者聖予爲文陸二公作傳而汪嘗以槩訪信國獄中梁鄭皆義不仕元方吳二子並吾婺人與謝翱善翱慟哭西臺實相倡和景熙玉潛收故主遺骨世所共知諸

人率工文詞不但氣節之美今林謝詩集尚傳汪鄭二子詩附見集中咸足諷詠然同時劉會孟黃東發亦以宋遺民不仕元學行尤卓卓云

福寧州新志

殷之輅

宋謝翱字臯羽鑰之子咸淳初試進士不第落魄漳泉間會元兵南下文丞相天祥走海上至閩檄州郡大舉勤王翱傾家貲率鄉兵數百人赴難遂叅軍事丞相轉戰閩廣至潮陽被執翱匿民間流離乂之間行抵勾越王監簿方延致

明皇集 卷之十一
游士日以賦咏相娛翽時出所長諸賢豪見者
皆內遜不知爲天祥客也然終不自明更念久
不去人將跡我乃去而之浦陽依方鳳與未康
吳思齊善翽嘗上會稽窺祐思諸陵輒哭登姑
蘇臺哭嚴有子陵臺翽挾酒以登設天祥主荒
亭隅拜伏酌畢又哭語具西臺慟哭記中宋遺
民會稽唐珏瘞諸陵骨于蘭亭山種冬青樹爲
記翽實與其事嘗爲作冬青樹引聞者莫不洒
泣至元甲午去武林前代遺老多存者咸自詫

見翽晚明年乙未以肺疾作而死年四十七方
鳳等塋翽子陵臺南以文槁殉墓右建許劔亭
其徒吳貴買田月泉書院祠之祠曰晞髮處士
有許劔錄晞髮集續騷經二十五篇其友方鳳
吳謙爲志狀太史宋濂有傳

忠義錄

王 冀

謝翽以一布衣宋亡不忍背宋徬徨窮山守義
而終

風雅叢談

王應山

謝翱字臯羽閩之長溪人蚤事科舉學治春秋
咸淳初試進士不第作宋祖鏡吹曲騎吹曲上
太常樂工肄習之嘗思捐軀殉國難杖策之延
平參丞相文天祥軍事居建之浦城落魄漳泉
間後遊嚴陵與鄧牧方鳳輩爲方外友會所曰
汐社期其晚而信也如唐衢登姑蘇臺慟哭終
日過勾越探禹穴又北向哭晚登子陵西臺吊
文丞相奠以牲醪用竹如意擊石悲歌作招魂
之詞歌闋放聲大哭竹石俱碎所爲詩自三百

篇而下卓卓乎入唐人門徑集以晞髮自命神
詞鬼語變幻不測蓋屈平伍耶初翱無恙時得
唐方干舊隱白雲村嘗言死必葬之作許劔錄
疾革語其妻劉我死以骨歸吳恩齊方鳳葬我
許劔之地方鳳狀其行吳謙作墳誌鄧牧爲傳
其徒吳貴買田月泉歲時蒸嘗云臯羽嘗作鴻
門讌楊用修極稱之李賀集亦有鴻門讌不逮
臯羽遠甚可謂出藍逾青矣予家故藏晞髮集
隱几讀之以爲陶彭澤流亞覽其時事知臯羽

謝翱集 卷之十
十一
覃思益精節亦良苦集有西臺慟哭記託之顏
魯公宋太史濂謂如韓愈祭田橫文寄哀隴西
公也皐羽不辰卒以客死後昆孑然千百載下
誦其殘篇誰非酸鼻者鄭所南感時幽憤有同
情焉予故附之皐羽

建寧府志

楊 垚

謝翱字皐羽福之長溪人後徙浦城家故羸放
財試進士不第以文章名家宋相文天祥開府
延平檄州郡大舉勤王翱傾家貲率鄉兵數百

人赴難遂參軍事及宋亡天祥死走子陵臺設
天祥主跪伏再拜作楚歌招之悲思慟哭不可
遏于是流離匿民間尋隱者方鳳吳思齊吟咏
以自適一不問當世事至元甲午去家錢塘病
革語其妻劉氏曰吾去鄉千里交游惟方韶卿
吳子善可收吾骨及吾文授之葬我于許劔之
地

錢唐縣志

聶心湯

謝翱字皐羽福州人自號晞髮子至元末家西

湖上聞文天祥被執翱悲不能禁失聲哭桐江
有子陵臺孤絕千尺時天涼風急挾酒登其上
設天祥主拜跪伏酌作楚歌招之獨好佳山水
遇卽恣游沒友人移柩塋子陵臺南有文集二
十卷行世

福安學志

吳仕訓

謝翱字臯羽穆洋人後徙浦城父鑰以孝稱通
春秋翱世其業咸淳初舉進士不第慨然以古
文倡作爲宋鏡歌鼓吹諸曲上太常習之會文

天祥開府延平翱散貲募數百人赴之署諮事
參軍後從文公轉戰至五坡被執翱匿潮陽民
間流離入浙善歌善哭過姑蘇臺則哭適會稽
訪禹穴則哭乘舟過蛟門登候潮山則又哭登
子陵臺設祭忠烈日暮涼風以竹如意擊石而
爲楚歌日魂朝往兮何極暮歸來兮江水黑化
爲朱鳥兮有味焉食歌罷竹石俱碎聞者傷之
汗漫超越寄懷山水每遊必紀錄以歸與杭人
鄧牧及浦陽方鳳結爲方外之友名其會所爲

夕社期晚而信云所著有史贊圖譜十餘卷許
劒錄及續騷二十五篇自號晞髮處士作塚瘞
所爲文旣卒友人方鳳輩爲塋于嚴陵釣臺之
南其徒吳貴建許劒亭買田月泉精舍祀之方
鳳吳謙爲志狀宋濂胡翰爲之傳

唐珏傳

張孟兼

唐珏字玉潛會稽人也至元戊寅浮圖總統揚
璉真伽利宋殯宮金玉故爲妖言惑主聽發之
珏不忍陵寢之暴露造石函六刻紀年一字爲

號自思陵以下收貯遺骸瘞蘭亭山後上樹冬
青樹爲識有謝翱者文丞相客也與珏友善嘗
感珏事爲作冬青樹引語甚慘苦讀者莫不灑
泣翱字臯羽閩人亦奇士云

金華縣志

胡頌

謝翱字臯羽閩之長溪人爲文天祥客宋亡天
祥被執翱變姓名入越初寓浦陽方鳳未康吳
思齊家來遊金華赤松鹿田三洞諸名勝間因
居焉遇景輒有題詠多黍離麥秀之感有晞髮

集讀者悲之

西湖游覽志

田汝成

謝臯羽之自嚴適杭也宋室遺老莫不就之恨相見之晚日在湖上對景賦詩不勝黍離之想有過故宮四絕次年遂沒臨終謂其家慎收吾骨與韶卿子善謂睦人方鳳吳思齊也已而二人果至與方幼學葬于子陵臺之南其徒吳貴祠臯羽于月泉書院

嚴州府志

徐楚

義士晞髮謝翱墓在釣臺南畔白雲源與宋起居舍人范端臣墓相並友人方鳳題曰宋處士謝臯羽之墓傍有許劒汝社二亭白雲源一名蘆茨源重山插天林麓茂盛鄉民採薪爲炭供數州丞爨之用源口對釣臺宋景祐中范仲淹登臺望東巖絕壁白雲徐生問之乃唐處士方干隱處也

白雲圖序

徐尊生

下子陵臺東畔爲白雲源睦之勝處唐處士方

玄英先生居之臺倚厓迫江而是源也逶迤廓
深東馳百里以達于江視臺爲遠千載之下聞
者神生游者意息勝非因地實由人也宋季元
初粵人謝翱亦嘗寓隱于此翱爲山水記稱源
之尤勝處有白雲嶺焉今方氏十九世孫安道
名其室曰白雲又爲圖以著其詠想庶幾前人
之風者與

金華洞天游錄

錢 奎

仙華先生方公著金華洞天游錄紀序繁濫不

便觀誦全讀之而竊病焉僭刪其詞而爲集畧
已丑歲正月謝翱臯羽方鳳韶卿約遊金華洞
天辛卯韶卿携子肖翁入邑與臯羽及陳公舉
帝臣會壬辰拂曉取道上樂吳嗣孫續古約俱
行登山幾半里至洞中洞口俯視深處乃暗穴
但聞潺潺水聲束數炬相後先若入井然視水
簾以下復沉沉深黑來遊者俱不敢入臯羽毅
然揚炬而前韶卿續古從之愈入愈深極底有
石室燥潔曾遊者留題在焉然不能深入則不

得盡其奇耳是夕歸宿鹿田寺臯羽作鹿田聽
雨記既下山韶卿臯羽續古肖翁取虎頭巖下
道而歸浦陽云

右記二千餘言今只
采臯羽事餘文不錄

吳善夫哀辭後

黃潛

元貞丙申秋予游仙華寶掌間因得拜先生浦
陽先生顧予喜曰吾二十年擇交江南有友二
人焉曰方君韶父曰謝君臯父今臯父已矣予
乃能從吾遊乎予謝不敢先生蓋予大父行也
時與畸人靜者發奇探奇以泄其羈孤感鬱之

思遇意所不釋亦望天末流涕其所居室扁曰
愚隱先生自號全歸子云

方先生集序

黃潛

先生沒百年之耆舊盡矣先生有友二人曰吳
氏善父曰謝氏臯父素以風節行誼相高而皆
前先生死先生諱鳳字韶父婺浦江人

送吳良貴序

黃潛

異時浦江方先生館同里吳氏枯吳先生善父
粵謝先生臯父咸在焉二先生隱者以風節行

詎爲人所尊師後進之士爭親炙之而良貴有聞于私淑爲多三先生杖屨所臨一言一笑無非教也

金華府志

周宗智

謝翱字臯羽閩浦城人署文信公府咨事叅軍宋亡信公被執遂變姓名寓居浦陽方鳳及永康吳思齊家間出遊金華赤松鹿田三洞俱有著作其詩卽黍離麥秀之響其志卽屈原豫讓之忠詳見方鳳吳謙狀志

謝翱閩人從文天祥起兵興復兵敗亡命浦陽忠憤抑鬱或被髮狎狂行歌于野或登釣臺慟哭以酹天祥已又作楚歌以招其魂與吳思齊方鳳三人皆以風節行詎爲人所師尊而皆工爲詩音調淒楚往往比諸麥秀黍離于時浦陽之詩爲之一變

月泉在浦江縣西二里源出仙華之下其泉視月盈虛爲消長宋政和間縣令王霖構精舍于泉上元改爲月泉書院祀謝翱

謝翱作鹿田聽雨記方鳳作聽雨詩云禪栖投
倦客山雨起更闌窓葉散幽響石林生峭寒洞
深猶暗瀑江遠忽風湍想像雲蘿外應宜曉色
看鹿田在金華縣北二十五里上有沃野可耕
東西二寺俱廢今有二菴存焉此山多生竒石

謝翱冬青引識

彭瑋

輟耕錄載發宋諸陵事未備謹按元世祖二十
一年甲申楊璉真伽發陵時義士唐珏林景熙
竊痛之陰相躬拾不盡遺骨別葬山中植冬青

爲識遇寒食則密祭之珏後獲黃袍引兒報德
之夢果生子琪爲名儒羅雲溪爲傳其事謝翱
爲托空詞作冬青引曰冬青樹山南陞九日靈
禽居上枝白衣種年星在尾

寅月也

根到九泉護

龍髓恒星晝隕夜不見七度山南與鬼戰願君
此心慎勿移此樹終有開花時山南金粟光離
離白衣人拜地下起靈禽啄粟枝上飛解者曰
謂應在庚金竄甲木也胡運絕于甲辰巳開先
于貞白之詩宋鳥啄粟于甲木又開先于晞髮

之句此豈偶然之作哉輿鬼托枯骨之靈靈禽
托宋鳥之子果天意耶人事也又按元宋生年
甲辰紀元天曆當時朝臣有引陶弘景胡笳曲
負宸飛天曆終是甲辰君之語以爲受命之符
甲木之謂也或問宋祚于邵子邵子對以五更
頭蓋謂五庚申也而元讖亦有曰大元之後有
庚申而順帝以庚申生纔六庚耳貞白弘景號
晞髮道人謝翺也成化己丑中秋華亭彭瑋識

浦城縣志

黎民範

天下之名山巨邑亦多矣非經文人達士栖托
其間湮滅者何可勝數故讓西表于少陵夜郎
著于供奉而徘徊隆中之區感慨嘯吟梁父之
烈試觀臯羽顛沛慕義三良草昧策勳雖遭遇
各殊而浦邑實其托宿之所石韞玉而輝淵含
珠而媚則地以人重亦其常也因紀寓賢

遂昌雜錄

鄭元祐

謝臯父先生諱翺自號晞髮處士讀書博學宋
季以古文知名

秣苑卮言

王世貞

南渡以後陸務觀頗近蘇氏而龔楊萬里劉改之俱弗如也謝臯羽微見翹楚鴻門行諸篇大有唐人之致

五岳游草

王士性

釣臺者漢嚴光隱處白雲原唐方雄飛隱處其上
有塚則宋謝臯羽所慟哭而終焉者也二子皆聞先生風如梁伯鸞覓葬于要離之側

客窓隨筆

趙世顯

謝臯羽哭文天祥慷慨激烈其過故宮四絕千古而下讀之尤令人酸鼻

杭州府志

陳善

謝翱不墜家學遐企古人志意卓矣乃其悲憤之衷雅正之調時時宣洩于詞翰篇咏間彼豈流連光景者耶

跋西臺慟哭記

張蔚然

子陵釣臺二竝峙于七里瀨北洑其上流近睦者爲西臺下流爲東臺岼峇干霄頰瞰桐江卽

費千尺緡徒有羨魚情耳故說者指富陽城外
一片磯爲真垂綸處以證富春山中釣蹟至嚴
瀨雙臺謂取境幽奇迥絕借爲標表是耶非耶
臯羽慟哭記多隱語其稱唐魯公豈比信公于
真卿乎曰宰相則明指而幻之矣過張睢陽及
臯卿處卽實事亦影詞也所云友人甲乙丙者
甲丙意卽方鳳吳思齊乙或卽呂居仁蓋釣臺
南溪爲白雲源是居仁避地處記稱登岍宿乙
家豈卽是與不然此哭卽邏舟亦思使知他人

安得輕與聞也鳳著行狀云歲晚爲文祭信公
望天末其哭自是與予爲異姓兄弟不忍離益
足徵矣臯羽父名鑰字君啓其曰先君諱某字
某亦隱之也其但稱明年後幾年及歲在乙丑
而不著年號一秘其踪一彷彿桑氏第書甲子
之義也其詩哭所思哭所知皆卽信公也夫西
臺一哭自足千古志厲跡潛行高言孫鴻飛冥
冥安得矰羅以視羊裘老子似更上一格矣

在六朝無六朝習氣者左太冲陶彭澤也在唐無唐習氣者初唐陳拾遺盛唐孟襄陽中唐韋蘇州韓昌黎晚唐司空圖也在宋無宋習氣者謝臯羽也此亦關於其人蓋六朝之習靡唐之習囂宋之習萎非其人有超焉者曷以洗此

高賢傳

徐燭

謝翱字臯羽福安人咸淳初試進士不第作宋祖鏡歌曲上太常樂工習之至今傳其詞嘗參文信國軍事及宋亡信國被執死挾酒登釣臺

設信國主再拜伏酹慟哭者二以竹如意擊石作楚歌招之然其志汗漫超越獨嗜佳山水如雁山鼎湖蛟門候潮沃洲天姥野霞碧雞四明金華所至卽造游晝夜吟詩不休直溯唐風精鍊竒警不作宋人陳言文尤峭勁有法當其執筆時瞑目遐思身俱天地俱忘日用志不分鬼神將避之故思益苦而句益工嘗與鄧牧方鳳爲方外友扁會所曰汐社期晚而信也東南人士重詩社每一有力者爲主聘詩人爲考官畧

如科舉之法浦江潛齋吳渭月泉吟社實鞠爲
考官以春日田園雜興爲題首取杭清吟社羅
公福乃閩三山人其詩名見重于時如此年四
十七卒無子塋白雲村許劍之地以詩文稿殉
楊太史用脩稱其詩如長吉復生眞實錄也後
人并嚴羽目爲嚴謝兩先生云

祭謝臯羽文

董應舉

萬曆甲寅秋八月初五日鄉晚生董某以赴吏
部稽勲司郎中之任便道嚴灘拜嚴先生祠下

問于土人得吾鄉臯羽謝先生塋處敬飛棹上
謁嗚呼先生故宋長溪一布衣也痛胡元淪覆
宗國勉應丞相辟爲佐軍謀丞相敗而宋亡矣
先生哭至死某讀先生集以爲夷齊三千載下
惟先生一人耳先生塋處名白雲源與釣臺對
峙嚴先生善釣先生善哭其節義亦相敵嚴先
生遭光武漢至復完故可以釣先生遭宋季社
稷已屋麥秀之悲愴于心日故不得不哭哭悲
而釣樂亦其時然也先生爲宗國死爲故人死

死則死耳骨則千載猶存丞相柴市先生雲源
忠魂義魄貫日月而凌宇宙矣某先生之鄉後
進也雖官于朝尚未有以報國過先生墓下戚
戚于吾心焉是以停舟敬謁惟鑒而相其愚

謝臯羽攷證

徐 勳

予既校訂晞髮集客有問于予曰翱爲文丞相
咨事參軍丞相被執翱匿民間流離乂之間行
抵勾越人不知其爲天祥客也丞相死哭之不
已翱之報知己者出于常情萬萬獨不聞丞相

有一言及翱何耶予按宋史與丞相獄中自集
杜詩景炎元年五月朔端宗卽位于福州七月
四日丞相自永嘉至南劍州開府聚兵財爲收
復江西計于時幕府選辟皆一時名士詩云劍
外青天遠江閣臨石面幕府盛才賢意氣今誰
見斯時正臯羽傾家貲率鄉兵數百人赴難署
參軍事所謂幕府才賢者指翱也丞相又云督
機秘書謝杞閩士之秀空坑之敗不知所終詩
云俊逸鮑參軍優游謝康樂豺虎正縱橫南行

道彌惡予考丞相空坑之敗妻妾子女皆被執
謝杞不知所終與鞫坳合第姓同而名稍異耳
豈遇難之後逃匿民間欲人不知其爲天祥客
乃變其名曰鞫耶蓋父名鑰從金子名杞從木
豈父子取五行命名耶又按鞫舉進士不第作
宋祖銑歌鼓吹曲上太常丞相以太學名士鮑
參軍目之然則鞫之見重于丞相歷歷有徵矣
又考德祐景炎之際閩士以文學知名舍鞫而
外無別有所謂謝杞者杞之爲鞫當是一人也

漫識以俟知者

西臺慟哭詩

高啓

越人謝鞫嘗爲宋丞相文山公之客公死之
十二年登釣臺祭公以哭自爲文識其哀曰
西臺慟哭記東陽張兼持示求詩僕感其誼
遂賦一首

峩峩子陵臺其下大江奔何人此登高慟哭白
日昏哀哉宋遺臣舊客丞相門丞相旣死節有
身耻空存北望萬里天再拜奠酒尊陰雲暮飛

來恍如載忠魂所哭豈窮途中抱千古冤上悲
宗周隕下念國士恩淒涼當世事感慨平生言
空山誰知哀惟有猴與猿豈不畏衆驚聲發不
忍吞人言天有耳此哭寧不聞願因長風還吹
此血淚痕徃墮燕山隅一灑宿草根田橫去已
遠茲道不復論作歌悼往事庶使薄俗敦

過謝臯羽墓

黃潛

識子今無日風流可復尋山林餘楚製弟子解
閩音滄海他年夢青天後夜心平生匣中劍零

落遂于今

讀西臺慟哭記

何喬新

北風怒撼龍舟覆十萬貔貅葬魚腹廬陵魁輔
死燕山頸血化爲原草綠當時門下多俊材鳥
散雲消那敢哭裂冠毀冕彼何人俯首穹廬食
伏粟轅門從事抱孤憤芒屨潛行嚴瀨曲肯隨

留葉

留夢炎
葉李

立新朝甘與方吳

方鳳吳
思齊

卧空谷

朔風直上千仞臺采采溪毛薦寒淥歌殘楚些
招不來蕭瑟寒飈振林木仰天長哭天亦愁山

鬼驚啼猿躑躅冬青樹下頰往還淚眼摩挲望
天日鳳逝龍亡王氣消日暮驚鳥止誰屋褰裳
幾度濯江潯尚恐胡塵浣吾足帝日巫陽汝下
招促駕青虬歸玉局銑歌騎吹世空傳月表未
成竟誰續毅魄雖埋神不沒仙遊想在文山麓
相逢握手共欷歔細論興亡淚如掬浮雲倏忽
風中燭忠義千年有餘馥歸然荒塚釣臺東我
欲乘風莫醜醜

登釣臺尋謝臯羽墓

繆一鳳

獨向荒臺訪古丘白雲芳草兩悠悠可憐當日
西臺淚併作桐江日夜流

吊謝臯羽墓

劉元士

許劔白雲晞髮地西臺東社照人明至今竹石
前山碎猶帶當年善哭聲

過謝臯羽墓處

董應舉

釣臺南畔白雲源臯羽當年許劔存獨有首陽
山上月飛來夜夜照忠魂

讀謝臯羽集二首

崔世召

睇髮集 卷之十
俠骨竒蹤世所稀遺編讀罷泪沾衣魂隨宋寢
冬青樹墓傍嚴陵古釣磯天地祗餘身可漆江
湖何處髮髮堪睇寄言精衛休填海一哭西臺事
已非

又

平生一劍許難忘慟哭高原夢未央姓字短碑
題百粵悲歌長恨寄三湘文拈太姥含光草詩
逼奚奴古錦囊南國詞人君獨唱少微千載拜
寒芒

吊謝臯羽七言古詩

郭鳴琳

嚴灘夜撼客星墮野禽啣肉上枯樹隣家閩音
能越語哭斷千山白雲暮行吟散髮向日睇欲
歸不歸丁令威落花黯黯魂空飛似聞天外歌
採薇採薇歌聲出金石一淚西臺一點血孤竹
地下從君遊相逢莫話文山客借君如意扣君
歌英雄矢志柰若何猶餘怒魄震天地羅刹江
頭湧白波

睇髮集卷之十終

晞髮集跋

晞髮集宋邑先正謝臯羽公悲憤所為
 作也先是小子琳附纂邑乘次臯羽傳
 閱先達丁陽繆公哀刻晞髮集三復
 詩文未嘗不欷歔慨然想尚其為人
 者臯羽生邑樟南坂徙建浦會文忠

烈開府劍州傾賞募壯士以應及文壯
牢騷勾越章皇澤畔不勝故宫黍離
之愴焉忠憤悲楚洩諸咏歌託晞髮
自命登陵臺一擊一淚慟哭至死畸
人節俠之概其鬱惋忼烈有如此我
明宗公濂賞其詩直溯盛唐而上
文尤蘄拔峭勁至董銓部輓之謂夷
齊三千載下惟先生一人吁嗟臯羽不
道以文重洵以人重矣武林

張侯海內真儒出牧韓陽潮郡

吳先生以東粵名家署鐸宸序二

公卓以文章德義表鵠輒祭酒臯

羽公道晉安興公徐君大家清品有
訂正善本沿繆刻補拾而推廣之互
為參覈命琳不雙言以壽其傳予小子
于是有重慨焉夫自隼羽一拓落布

衣耳正氣所塞磅礴碎錮至烏哽
咽千祀若生琳玉父大科公青衿值

已未倭變捐金募毒箭手躬爨餉
守陴及城陷以抗戰唾賊死察三數
十載人與骨已朽矣觀風者竟錄其
人以死事祀輾轉憑吊豈英魂義魄
亘今濯靈抑忠義宇宙間而民彛直
道不容落一晦蝕者乎茲刻也承父

師懿好蓋蒐景行之芳亦以寄永慕
之悼云時

萬曆歲次戊午季春既望



邑後學郭鳴琳時鏘跋



